

NKARHI WA KU

HLANGANA NA XIKOMBISO

 I madyambu lamanene. I nkateko ku va lahawani vusiku lebyi, na ku yima eka ndhawu leyi.

² Mina, emixweni lowu, ndzi ri karhi ndzi rhelela hi pato... A ndzi yile eku khongeleni, ndzi rindzerile Hosi. Kutani loko ndzi ri karhi ndzi rhelela hi patu, ndzi pfulerile e—e muministara wa xiya-ni-moya, Makwerhu Smith, boti wa mukhaladi (xana hinkwenu mi nga va mi n'wi twile mixo lowu? Un'wana wa n'wina?) ehenhla le, ndzi pfumela leswaku i Ohio. Un'wana a ri karhi a ndzi byela hi mayelana na ku chumayela ka yena, nakona u te, “U fanele ku n'wi pfulela,” kukotisa sweswo.

³ Ndzi tikumile ndzi n'wi kumile, emixweni lowu. Nakona hakunene a ri karhi a vula hi mayelana na hilaha xidyoho xi nga eku taleni emisaveni namuntlha, nakona a ri... Kutani ndzi pfulerile ku yisa emahlweni, xitichi ku suka eka xexo, kutani ndzi rhelela ndzi ya twa un'wana. Hi nkarhi lowu ndzi nga fika lahawani, a ndzi lava ku lunghekela, ku vona loko ndzi nga hlwelanga ngopfu ku ya ekerekeni, mixo lowu loko ndzi nghena. Swingaleswi, hakunene hi na nkateko ngopfu ku va hi ri kona kwala vusiku lebyi, na ku tirha exikhongelweni xa Hosi.

⁴ Kutani ku vulavula hi Makwerhu Neville, na hungu siku rin'wana, eka manana loyi lontsongo, sesi wa hina loyi a nga hi sukela. Yaloye a kuri, hinkwerhu ha swi tiva leswaku a ku ri mani, i Sesi Weaver. Nakona ku ehleketa hi wanuna lahawani, a ri karhi a khuvuriwa vusiku lebyi; u... Ndzi n'wi khuvurile exidziveni lexi loko ndzi... a va fanele ku n'wi tisa lahawani hi xitulu xa mavhilwa. A ri eku feni, hi mfukuzani, nakona a ri na vusiku byebyo ku va a hanya; madokodela a ma n'wi lan'wile, a ya eku feni emixweni lowu a wu landzela. Kutani ndzi yile ekaya ra yena ndzi ya ringeta ku vulavula na yena hi mayelana na ku horisa ka Vukwembu, nakona a tshamela ro vuyeleta, “A ndzi ringanelanga ku va u ta ehansi ka lwangu ra mina.” A ku, “A ndzi—ndzi ringanelanga ku va muministara a va endlwini ya mina.” A ku, “Ndzi mudyohi.” Kambe u te, “Nkulukumba, a ndzi lavi ku fissa xileswi.” Swingaleswi Grace Weber, ehenhla lahawani, u ndzi yisile kwalahaya. A ndza ha ku nghena, ndzi karhele ku suka etinhlengeletanweni; kutani kwalahaya loko ndzi ri karhi ndzi n'wi khongelela, na ku n'wi hlayela Matsalwa, kutani u ponisiwile. Kutani, a nga swi koti na ku tlakusa voko ra yena, kambe a lava ku qhavula voko ra munhu un'wana na un'wana. Ntsena a... swin'wana a swi humelerile eka yena.

⁵ Kutani loko va ha ri karhi va qhavulana hi mavoko, ndzi vonile xivono xa yena a ri karhi a ya ehokweni ya tihuku, a tlhelela endzhaku. Ndzi ku, "Swi lulamile, swi ta tshamiseka sweswi"; nakona sweswo i khume nhungu wa malembe lawa ya nga hundza. Kutani u vile loyi a tlulelaka emahlweni ka mfukuzani yaleyo, nkarhi lowu hinkwawo. Loko ku ri ku u file... A nga kalanga a fa a ri na mfukuzani, u vile na nhlaseloa mbilu kutani yi n'wi dlayile. A va n'wi vekile ehansi ka moyo; u file hi nhlaseloa mbilu.

⁶ Kutani a ndzi ri karhi ndzi ehleketa, ntsena eku heteleleni loko vanhu va ri karhi va huma, nakona a va yimbelela, *Kutani Yesu U Tile*. Sweswo hileswi swi nga humeleta, U tile a fika a n'wi tsetselela vutomi bya yena eka khume nhungu wa malembe yalawayaya. Hiloko ndzi ehleketa, "A hi ku saseka ka swona." Wansati yaloye kumbexani a nga swi tivi leswaku u swi endlisa xisweswo. Kutani, nakambe, a nga va a swi tivile. Kambe ntsena hilaha a swi sasekile hakona ku va na xiphemu xexo lahaya, *Kutani Yesu U tile*.

⁷ Sweswi i xinkadyananyana ku nga si va, ndza—ndza tshembha, ntshamo wa mina lowukulu eka tinhlengeletano. Ndzi khomiwa hi rhumbyana swinene. Mixo lowu, a ndzi hlangananile, ndzi yile ehenhla kuya—kuya khongela. Kutani ndzi—ndzi le kaya, ku vuya lahawani. Ndyangu, ndza ha ku wu yisa e Arizona, nakona ndzi... leswaku vana va ta nghena xikolo. Kutani ndzi vuyile lahawani ntsena ku ta—ku ta wisanyana, ndzi ya eku hloteni na Makwerhu Wood na ntlawa wa vamakwerhu lahawani; ku huma hi ya eku hloteni, eka vhiki leri tako. Hi rhelela eKentucky. Nakona a ndzi... vile e... ndzi tikumile ndzi nghanile hi siku leri—leri Manana Weaver a nga lova hi rona, nakona swi kahle leswaku ndzi ta va ndzi ri kona ku ta pfuna Makwerhu Neville eka nkosi walowo.

⁸ Nakona a ndzi ringeti ku... A ndzi ringeti ku—ku vula swo tala hi mayelana na swona, ma swi tiva, ekusuhi na vanhu lava vilelaka. Hikuva, ndzi ehleketa leswaku, xin'wana xa swilo swo chavisa ngopfu i ku vona e—e wanuna kumbe wansati loyi a tshamaka a ri karhi a vilela. A ndzi tshamela ku ehleketa, "Xikwembu, ndzi sivel i eka swona." Wa vona, sweswo—sweswo swi tsanisa ripfumelo nkarhi hinkwawo, ma swi tiva. Ntsena mi—ntsena mi... loko mi—loko mi... Ndza swi tiva leswaku loko va ri karhi va kula, un'wana na un'wana wa hina, hi ya eku endleni ka leswaku swin'wana swi humeleta na swin'wana swi humeleta. Nakona ndza swi tiva leswaku swilo leswiya swintsongo swi ta ya emahlweni swi tala, sweswo hiloko u kula, swi fanele ku endla tano. Kambe ndzi ehleketa leswaku xin'wana xa swilo swo chavisa ngopfu, i ku va Sathana a tlhandleka xidlodlo ehenhla ka vutomi bya munhu un'wana: mukhalabya wo nyangatsa kumbe mukhegula, ma swi vona. Ndzi—ndzi tshembha leswaku a ndzi nga fiki eka xiyimo xexo. Ndzi tshembha leswaku ndzi

ta swi kondzelela, mindzhwalo ya mina, kutani—kutani ndzi fika eka xiyimo lexi... Ndzi lava leswaku vutomi bya mina byi tlhandlekiwa xidlodlo hi ku Kwetsima ka Xikwembu: ku leha mbilu ka Yena, ku olova, ku rhula, vunene, na ku tatiwa hi Moya lowo Kwetsima.

⁹ Kutani ndzi... xin'wana xa swilo swa mina leswikulu lexi nga tshamela ro ndzi vavisa vutomi bya mina hinkwabyo, ku vile rhumbyana. Leswaku loko ndzi karhala ngopfu, kutani ndzi sungula ku vilela. Ndzi sungula... ku titwa tanahi loko ku nga ri na loyi a nga na mhaka na wena, ma swi tiva, nakona—nakona hinkwenu mi... Mi na swona, na n'wina. Kutani ndzi kumeka ndzi ri na swona hi mpimo wo tlurisa, ma swi tiva, nakona swi nyanya swinene nkarhi wun'wana, nakona a ndzi swi koti na ku... I ntshikelelo, kutani sweswo hileswi swi swi endlaka. Nakona ndzi fika eka xiyimo laha minkarhi yo tala, ngopfu-
ngopfu swonghasi hi swivono leswiya, ma swi vona, ntsena wa ndzi khoma. Ndzi langutisa munhu, ndzi ehleketa, "Lexii xivono. Ee, ee, ee, a hi xona. Ina! Xana a hi xona?" Ma swi vona? Nakona ntsena a wu swi lemuki leswaku i ntsengo muni lowu fambaka na sweswo. Swingaleswi—swingaleswi wa—wa tivutisa. Kutani u sungula ku ehleketa, "Kunene, u le..." Kutani u suka etlhelo ka wena kutani u ku, "Kunene, sweswi, xana—xana ndzi endlile yini? Hi mina loyi, ndzi—ndzi na makume ntlhanu wa malembe hi vukhale nakona a ndzi yi endlelanga nchumu Hosi; ndzi—ndzi le ku khalabyeni. Kutani xana... ? Oho, mina." Kutani ntsena u kuma e... leswi a hi tshamela ku swi vitana "gome." Van'wana va n'wina vamakwerhu lava va ringanaka na mina ma swi tsundzuka leswi a va tshamela ku swi vitana "ku va na gome." Papa a tshamela ku vulavula hi swona nakona a ndzi tivutisa leswaku u vula yini, nakona hakunene ndza swi tiva leswi a swi vula. Swingaleswi, u kumeka u ri karhi u titwa hi ndlela yaley, leswi na xin'we xa swona xi nga riki ntiyiso; ntsena ko va wena, wa swi tiva. Wa vona, wa swi tiva, ntsena ko va wena u endlaka sweswo.

¹⁰ Swingaleswi a ndzi ri eku ringetenka ku timiyetanyana sweswi, na ku tilunghisela e—e nsusumeto lowukulu lowu ndzi tshembhaka leswaku wu le ku teni. Kutani ku hundza... Ndzi fanele ku ya eNew York xikan'we-kan'we, nakona ndzi... eka nhlengeletano kwalahaya, pfumba. Kutani ku rhelela eShreveport, ivi ndzi tlhelela ePhoenix. Kutani ndzi ya evupeladyambu... ndzilakano wa le dzongeni wa United States. Kutani va le ku lulamiseleni ka swa le ntsungeni wa malwandle sweswi, ku va swi sungula hi xihatla hilaha hi nga kotaka hakona endzhaku ka masungulo ya lembe, kumbexani Nyenyankulu, Dzivamisoko, swin'wana swo kota sweswo; laha mi sungulaka eStockholm kumbe Oslo, na ku rhendzeleka na misava, loko hi swi kota eka rendzo leri landzelaka.

¹¹ Kutani sweswi ndzi le kaya, tanahi ku wisanyana, ku endla tanahi ku tivuyetelanyana na tanahi ku hlakarhela. Kutani loko

Hosi yi swi rhandza, ndzi ta va ndzi vuyile hi Sonto lowu taka, ku suka ehansi le Kentucky. Nakona—nakona loko ku ri ku swi lulamile, swi ri karhi swi tsakisa Hosi, nakona Makwerhu Neville a nga vileli; kunene, ndzi ta ringeta ku va na xikhongelo eka Sonto lowu taka, loko—loko Hosi yi swi rhandza. Kutani loko Yi swi rhandza kukotisa hilaha Makwerhu Neville a swi rhandzaka hakona, ndzi—ndzi ta va kona. Ina nkulukumba, ntsena Yi tani hi...loko Yi swi rhandza mayelana na swona kukotisa Makwerhu Neville. Ndzi tshembha leswaku Yi tano. Sweswi, wa vona, kutani ndza swi tiva leswaku ku nga ri khale ndzi, loko Hosi yi swi rhandza, ndzi ta va ndzi ri ekule na n'wina nkarhi wo lehanyana.

¹² Kutani ndzi...ntsena swihungwana swintsongo, tanahi laha ndzi kumaka swintsongo nyana embilwini ya mina, kutani ndzi—ndzi—ndzi twa ingaku ndzi lava ku mi kombisa swona, ma swi vona, nakona hi nga va na xinakulobye eka swona. Sweswi, ndzi na swintsongo swa swona, ntlanu kumbe ntsevu leswi ntsena swi nga ta eka mina eka masikunyana lawa ya nga hundza. Kutani ndzi yile, masiku nyana lahawani, eku hloteni ka vamaxinjani ehandle lahawani. Kutani ndzi nghena enhoveni, ivi ndzi titekela penisele na phepha. Wa vona? Sweswi loko ku fika nkarhi laha ku vaka kahle na ku va vurhonga, ndzi tiseketela hi nsinya kun'wana. Loko ndzi nga khomiwi hi vurhongo, ndzi sungula ku khongela, kutani ndzi, Hosi yi ta ndzi nyika swin'wana, ndzi sungula ku tsala tinotsinyana ta swona ehansi, ma swi vona. Ma swi tiva leswi ndzi swi vulaka; loko mi tivuyetela, kutani mi...Kutani hiloko ndzi nghena, ndzi swi tsala hinkwaswo eka xiphemu xa phepha. Kutani loko ndzi vitaniwa, ndzi tsutsuma ndzi ya kuma xiphemu xa mina xa phepha ivi ndzi ya sungula ku langutisa na ku vona leswaku ndzi nga sungula hi yini, ma swi vona. Sweswo hileswi nga humelela sweswi.

¹³ Swingaleswi sweswi, ndzi lava ku, loko Hosi yi swi rhandza, ku vulavula ntsena...Ndzi le ku ringeten i ka ku endla...ku tsema lamakulu, mahungu mo leha, ma swi vona; laha swi mi tekelaka tiawara. Kutani Xikwembu xi ndzi pfunele ku endla ntirho wa swona wo koma eChicago, eka vusiku byo hetelela kwalahaya, kwalomu ka makume nharhu wa timinetse. Kutani munhu un'wana u tile kwalahaya, a ku, "A ndzi nga ehleketi leswaku a swi ri kona eka wena, kambe u swi kotile!" Swingaleswi makume nharhu wa timinetse, ku suka kwalomuya ka tiawara timbirhi na hafu, kumbe tinharhu, ma swi tiva. Swingaleswi kumbexani ndzi nga hatlisa vusiku lebyi kutani ndzi kuma xitoloveto, ku nga ri ku mi khomeleta nkarhi wo leha ngopfu.

¹⁴ Xikwembu xi mi katekisa. Hambiloko ndzi ya kwihi na kwihi, a ku nge tshuki ku vile na ndhawu yo tanahi tabernakele leyi lahawani. Hi le kaya, kaya ro tsokombela. Nakona ndzi le ku

rileni na ndyangu wa ka Weaver. Kutani na boti wa mukhaladi wo hlawuleka loyi a nga lova, ndzi khongerile xinkadyananyana na yena loko a nga se famba, nakona a ri ximunuhatwa xa kahle. Naswona u le Kaya na Xikwembu sweswi, hinkwaswo swi herile. Nakona mi ta boheka ku famba hambiswiritano, nakona hinkwerhu ha swi tiva sweswo. Swingaleswi hi le... ingaku Hosi yi nga wisisa mimoya-xiviri ya vona hi ku rhula, kutani siku rin'wana hi langutela ku ya joyina Tiko leri nga halahaya, laha ku nga riki na vuvabyi, gome, kumbe rifu. Ku fikela nkarhi walowo, a hi endleni hinkwaswo leswi hi nga ta swi kota hikokwalaho ka Evhangeli.

¹⁵ Ku vulavula hi ntshikelelo, a ndzi ri karhi ndzi khongela hi mayelana na wona mixo lowu. Xana a wu ta endla yini loko a wu nga ri na ntshikelelo? Ntsena ehleketa hi swona. Ntshikelelo i xiphemu xa ku hanya. Sweswo swi ndzi khutazilenyana loko ndzi ehleketa hi swona. Loko ku ri ku a mi nga ri na ntshikelelo, a mi ta kotisa n'wapopu wa magume, a mi ta va mi nga ri na vutitwi. A ku ta va ku ri hava lexi mi nga xi tirhaka. Kukotisa nuna na nsati, kumbexani loko a lava ku endla swin'wana, nakona va ri karhi va ringeta ku tirhisana (ngopfugopfu Vakreste), kutani loyi un'wana a lava... Kutani loko mi hlangana kun'we ku va mi... u kuma leswi a nga swi endla; yena a kuma... Wa vona, hakunene ntshikelelo wu mi tshineta ekusuhi. Kutani un'wana a ku byela leswaku, "Kunene," a ku, "ntsena ehleketa hi nsati lontsongo loyi a nga hundza hi le hansi ka ntshikelelo wo tala loko wena u nga ri kahle ngopfu," kumbe "nuna u hundzile ehansi ka ntshikelelo wo karhi loko wena u nga ri kahle ngopfu. Kutani loko hinkwaswo swi rivaleriwile, languta hilaha u titweke hakona hi mayelana na yena. Mina, ntsena u..." Wa vona, mi fanele ku va na ntshikelelo. Hi sweswo ntsena.

¹⁶ Na swona ehleketa ntsena, hi vutitwi, loko ku ri ku a mi nga ri na vutitwi-ke, mi nga ri na switlhavi kumbe mi ri hava nchumu? Loko ko ka ku nga vi na switlhavi ke? A mi nga ta va na vutitwi na swintsongo. Wa vona? Naswona loko ku ri ku a mi nga ri na vutitwi, kutani xin'we xa switwi swa n'wina a xi ta va xi sukile. Wa vona? Swingaleswi, wa vona, hinkwaswo ntsena swi kahle hambiswiritano. Swingaleswi, "Xikwembu, ntsena hi nyike tintswalo ku va hi yima eka tonu," hi wona nchumu wa kona. Loko ntsena hi yima hi tintswalo teto, kutani hi yima kwalahaya hi ku, "Ha swi tiva leswaku loko vutomi lebyi byi herile, lonkulukumba u le ka tlhelero lerin'wana laha hi languteleku ya kona." Kutani sweswi, hi-hi tsundzuka leswaku swilo hinkwaswo, walowo i ntshikelelo.

¹⁷ Leswaku, vanhu van'wana va ringeta ku tivisa Vukreste, leswaku "u ntshuxekile eka ku vilela. Wena u..." Ee, a wu tano. "U ntshuxekile eka ntshikelelo." Oho, ee! U engetela ntshikelelo loko u hundzuka Mukreste, hikuva a wuri tanihu loyi a nga

vileriki, loyi a nga riki na mhaka, hambi a ku ri yini kwalahaya, u nga ri na mhaka na leswi a wu swi endla.

¹⁸ Kambe loko u hundzukile Mukreste wa xiviri, nkarhi hinkwawo u le ku tivutiseni, "Xana ndzi le ku tsakiseni ka Hosi? Loko a ndzo twa ku suka eka Yona!" Swi ku veka eka ntshikelelo, swi ku veka eku rindzeni. Sweswo hileswi swi ku endlaka u va leswi u nga xiswona. Swingaleswi eka hinkwaswo, ntshikelelo i nkateko. Ntsena wu xileswi u wu langutiseke xiswona. Wu xileswi u wu langutiseke xiswona. Wa vona? Loko ntsena u nga langutisa eka tlheloh lerin'wana, ku na—ku na... Swi nga ri na mhaka leswaku xin'wana na xin'wana u xi tsema xi larisa ku yini, u tama wa ha ri na matlhelo ma mbirhi eka xona, ma swi vona. U lava ku vona matlhelo ha vumbirhi.

¹⁹ Swingaleswi ntshikelelo... Ndzi ehleketa, "Oho mina, i... Xana i yini ntshikelelo lowu? Loko a ndzi lo tswariwa ndzi nga ri na wona ntshikelelo lowu." Kunene, loko a ndzi nga vanga na wona ntshikelelo lowu, a ndzi nga ta va ndzi ri leswi ndzi nga xiswona. A ndzi nga ta va ndzi ri Mukreste, kumbexani. A ku ri ntshikelelo lowu wu nga ndzi yisa eka Yesu Kreste. Wa vona? Swingaleswi, wu vile nkateko eka mina.

²⁰ Swingaleswi, tanahi laha Paul a nga vula hakona, tanahi loko a ri na ntshikelelo kumbe swin'wana, u tihlanganisile na Hosi ku—ku wu susa eka yena ku ringana kanharhu. Kutani Hosi yi ku, "Saul, ta Mina... Paul, tintswalo ta Mina ti ringanerile."

²¹ A ku, "Kutani, ndzi ta titsakela eku tsaneni ka mina. Kutani loko ndzi tsanile, ndzi ni matimba." Wa vona? Ntsena loko ku ri ku rhandza ka Xikwembu, swi lulamile.

²² Sweswi, ndzi tihlanganisile na Yona nkarhi wun'wana loko wa ha ndzi karhata swinene, a wu ndzi chavisa. Kutani Yi ndzi byerile, kwalomu ka nhungu kumbe khume ra malembe lawa ya nga hundza, Yi ku, "Wu nga ka wu nga ha ku chavisi nakambe." Nakona a wa ha kalanga wu swi endla. Ee, nkulukumba; u nga—u nga vileli hi wona. Ndzo wu twa ntsena, kambe ndza swi tiva leswaku wu kona; kambe ndzi ya emahlweni hikuva a wa ha ndzi chavisi, ndzi khensa ngopfu hikokwalaho ka sweswo.

Sweswi, a Yi ta va yi te, "A wu ngevi kona na kan'we," ntsena tanahi ku, "U nga ka u nga ha chavi na kan'we."

²³ Swingaleswi i ku rhandza ka Yona ku va swi humelela, swingaleswi ndzo swi vukarha kutani ndzi ku, "Ndza Ku khensa, Hosi, ndzi ta famba hi ndlela liya."

²⁴ Sweswi, a hi korhamiseni tinhloko ta hina xinkadyananyana ku va—ku va hi khongela. Xana ku nga va ku ri na xikombelo xo hlawuleka xa xikhongelo? (Ndzi vona swidukwana swi tlhandlekiwile lahawani.) Yimisa voko ra wena. Hosi, katekisa un'wana na un'wana wa vana va Wena.

²⁵ Tata wa hina wa le Matilweni, tanahi laha sweswi hi kongomaka xa Wena lexi kulukumba, Xiluvelo xo saseka xa

tintswalo, hikuva hi komberiwile ku ta. Hi ta ehenhleni ka ku lerisa ka Yesu Kreste. Nakona hi ta na ku vilela ka hina hinkwako, kutani hi ti cukumetela ehenhla ka Yena hikuva U na mhaka na hina. Kutani i ku chavaleleka ka kahle njhani, ku tiva leswaku U na mhaka na hina. Xikwembu lexi kulukumba xa le Matilweni, Mutumbuluxi, xi na mhaka na hina, switumbuluxiwa swa Xona. Hi tsakile swinene hikwalaho ka sweswo, Hosi. I ku chavaleleka ka njhani eka minkarhi leyi hi hanyaka eka yona, loko swi tikomba swi koteke ku—ku koka ku chavaleleka ku nga ri kun'wana handle ka le Ritweni ra Wena. Sweswo i ku chaveleriwa ka hina, i Xitsembhiso xa Wena. Kutani eka Xitsembhiso xa Wena, U vurile leswaku hi tivisa swilaveko swa hina, nakona "Loko mi kombela xin'wana na xin'wana hi Vito ra Mina, Ndzi ta xi endla." Naswona hinkwaswo Switsembhiso leswi kulukumba: "Kombela u ta nyikiwa. Byela ntshava leyi leswaku, 'Suka,' kutani u nga kanakani, kutani yi ta suka." Hinkwaswo Switsembhiso leswi, nakona hi nga ha koka eka Sweswo ntsena leswi hi nga eku swi kombeleni.

²⁶ Mavoko ya tlakusiwile, va lava swin'wana, Hosi. Wena u tiva swilaveko swa vona; va nyike swona, Tatana. Ndzi veka xikhongelo xa mina na swa vona emahlweni ka Wena, voko ra mina ri le henhla na ma vona. Lahawani ku tlhandlekiwile ehenhla ka desika leriwani, swidukwani swi tlhandlekiwile lahawani. Oho, hilaha vanhu lava va nga na ripfumelo, ripfumelo ro tiya, Hosi... Swi tikomba ku ri nchumu lowu U nga ndzi katekisa hi wona, kukota ku khongelela vavabyi. Kwihi na kwihi, kun'wana na kun'wana, kwihi na kwihi laha ndzi yaka kona, hi swin'wana mayelana na ku khongelela vavabyi. Xikwembu, pfuna sweswi. Ndzi khongela hi ku tshembheka leswaku U ta hi nyika swikombelo swa swidukwana leswi nga vekiwa lahawani, eka vanhu lava va nga swi kombela. Tintswalo ta Wena a tive ehenhla ka vona.

²⁷ Hosi, hi twisia leswaku Sesi Hicks u na wansati lahawani, loyi a nga haha ndlela hinkwayo a ta ku suka kun'wana ku va a ta khongeleriwa, hi mfukuzani; nakona a lava ku tiva loko ku ri ku a nga endla leswaku a ta lahawani. Ndza khongela, Xikwembu, leswaku U tsetselela vutomi bya munhu yaloye; hi nyike swona. Xintukulwani xa mina, Mikie, u pavalarile kwalahaya a ri eku vabyeni na ku hlanta, u na ku hisa lokukulu ka miri, wa ha ku suka erivantini. Hosi, ndzi—ndzi pfumela leswaku hi vile na xikhongelo xa ripfumelo lahaya lexi U nga ku yimisa, nakona ndza—ndza—ndza khensa eka Wena, ku va ndzi twile ku hisa ka miri ku suka emirini wa mufana loko ndzi nga se suka ekamareni.

²⁸ Sweswi, Hosi....nakona ndza Ku khensa eka swilo leswi hinkwaswo. Sweswi i nkateko wa mina ku va ndzi vulavula hi Rito ra Wena. Hi nyike Rito ra Wena, Hosi. "Rito ra Wena i Ntiyiso." Katekisa mimoya-xiviri ya hina naswona u hi nyika

e—e tintswalo leti hi ti lavaka, leswaku hi ta ti koka ku suka eka Switshembhiso swa Xikwembu vusiku lebyi, eRitweni, ku va ti hi tiyisa eka vhiki leri hinkwaro; hi nyike swona. Katekisa mufundhisi wa hina, moy-a-xiviri lowu wa vurhena, nsati wa yena, vana va yena, madiyakoni, mathirasti, na munhu un'wana na un'wana loyi a nghenaka kumbe ku huma emuakwini lowu; hi nyike swona, Tatana. Hi Vito ra Yesu Kreste hi kombela minkateko leyi. Amen.

²⁹ Sweswi, ndzi lava ku hlaya ku suka etindhawini timbirhi ta matsalwa ya Hosi. Ndzi lava ku hlaya ku sungula ku suka eka Buku ya Tipisalema, Pisalema ya vu86. Kutani ndzi lava ku hlaya ku suka eka Mukwetsimi Matewu, kavanyisa ka vu16, 1 ku fika eka 3. Nakona ndzi lava ku hlaya xiphemu xa Pisalema leyi, ku nga ri hinkwayo ka yona kambe ku rhelela ku ya eka ndzimana ya vu11, leswi swi nga ehenhlanyana ka hafu ya yona.

³⁰ Kutani ndzi lava ku tivisa leswi, loko ndzi ri vula tsalwa, loko ndzi nga se chumayela hi rona: *Nkarhi Wa Ku Hlangana Na Xikombiso*. “Xikombiso xa nkarihi wa ku hlangana,” sweswo swi twala tanahi loko swi nga twisiseki. *Ku Hlangana* (Wa vona?) *Nkarhi*, karhi wa ku hlangana, sweswo hileswi swi nga swona sweswi. Na *Xikombiso* xa nkarihi walowo wa ku hlangana.

³¹ Eka—eka Pisalema, xikhongelo xa Davhida, Pisalema ya vu86.

Rhiya ndleve ya wena, O Hosi, u ndzi yingisa: hikuva ndzi xisiwana naswona ndza pfumala.

Hlayisa moy-a wa mina; hikuva ndza tenga: O wena Xikwembu xa mina, ponisa nandza wa wena loyi a ku tshembhaka masiku.

Ndzi twele vusiwana, O Hosi: hikuva ndzi huwelela eka wena hi masiku hinkwawo.

Tsakisa moy-a wa nandza wa wena: hikuva eka wena, O Hosi, ndzi tlakusela moy-a wa mina.

Hikuva wena, Hosi, u lonene, naswona u lulamerile ku rivalela; na ku tala hi tintswalo eka hinkwavo lava va huwelelaka eka wena.

Rhiya ndleve, O Hosi, eka xikhongelo xa mina; . . . yingisa rito ra ku huwelela ka mina.

Hi siku ra khombo ra mina ndzi ta huwelela wena: hikuva wena u ta ndzi hlamula.

Oh, xana a swi sasekanga sweswo? “Wena u ta ndzi hlamula.”

A ku na loyi a ringanaka na wena exikarhi ka swikwembu, O Hosi; nakona ku hava mintirho leyi yi fanaka na mintirho ya wena.

Matiko hinkwawo lawa u ma endleke ma ta ta ku ta ku nkhisamela, O Hosi; naswona ma ta twarisa vito ra wena.

Hikuva u lonkulu, u endla swilo swo hlamarisa: u Xikwembu u ri wexe.

Yingisani sweswi:

Ndzi dyondzise ndlela ya wena, O Hosi; ndzi—ndzi ta famba entiyisweni wa wena: hlanganyeta mbilu ya mina e ku chava vito ra wena. (Vun'we! Wa vona?)... hlanganyeta mbilu ya mina e ku chava vito ra wena.

³² Ndzi le ku vulavuleni sweswi hi ku *hlanganyeta* na *xikombiso xa nkarhi*. Sweswi, eka ku avanyisa ka vu16 eka Mukwetsimi Matewu:

Vafarisi na Vasaduki va tile,...e ku n'wi ringa, va kombela leswaku a va kombisa masingita lama ma humaka etilweni.

Kutani Yena a hlamlula a ku ka vona, Loko ri perile, mi ri, ndzi... Ri ta xa: hikuva tilo ri tshwukile.

Kutani ni mixo, Ri ta va ehansi...maxelo yo biha namuntlha: hikuva tilo ri tshwukile na ku endla ntima. O n'wina vakanganyisi, mi kota e ku vonisisa ku hundzuka ka nghohe ya tilo; kasi mi tsandzeka ha yini ku vonisisa swikombiso swa minkarhi leyi xana?

Hosi a yi engeteli minkateko ya Yona ya tintswalo eku hlayiweni ka Rito leri.

³³ Sweswi, hi le ku vulavuleni hi ku nhlangana loku, nkarhi wa ku hlangana; xikombiso xa nkarhi wa ku hlangana. Wa vona, Yesu a ri kona, eka Tsalwa leri nga hetelela ku hlayiwa, A ri karhi a tshinya vafundhisi hikokwalaho ko va va nga koti ku vonisisa nkarhi kumbe xikombiso xa nkarhi. Sweswi, sweswo nkarhi hinkwawo swi vile nchumu lowukulu eka vanhu, wa vona, kukota ku vonisisa *xikombiso xa nkarhi lowu mi hanyakaka eka wona*; hikuva Xikwembu xi xi tsala xi va erivaleni leswaku ku nga vi na loyi a nga ta xi balekela.

³⁴ Sweswi, hi ntolovel, a ndzi ta tlhelela endzhaku ndzi ya yisa emahlweni ku suka eka vavuri va Rito lavan'wana, malandza laman'wana ma Hosi hi nkarhi wa Bible (tani hi xikombiso xa nkarhi wa Nowa, xikombiso xa nkarhi wa Daniel na—na swin'wana, swikombiso swo hambana-hambana), kambe ndzi lava ku tlula sweswo vusiku lebyi ku—ku hlayisa nkarhi, kukota ku... Kambe nkarhi hinkwawo swi vile hi ndlela ya Xikwembu, ku va nyika e—e xikombiso xa ntumbuluko xa nkarhi, leswaku un'wana na un'wana a ta swi tiva leswaku a ku ri—ku ri nkarhi muni. Naswona Vafarisi lava a va fanele ku va va tivile nkarhi wa vona. A va fanele ku va va swi tivile leswaku a ku ri nkarhi muni. U virile eka ndhawu yin'wana, “Loko ingi mi Ndzi tivile, a mi

ta va mi tivile siku ra Mina.” Wa vona? I—i nchumu, lowu—lowu kulukumba ku va hi twisisa. Wa vona, “Handle ka ku twisisa!”

³⁵ Sweswo hileswi a va tshamela ku kongomisa eka vaprofeta hi mayelana na swona, va te, “Nakona a ri na ku twisisa, hi swivono leswi humaka eka Hosi. Kutani Rito ra Hosi ri tile eka—eka vaprofeta va khale.” Wa vona, a va ri na ku twisisa eRitweni ra Hosi, hi vaprofeta. Kutani, vaprofeta a va nyika xikombiso. Tanihi loko, wanuna un’wana a etlerile hi rimbambu ra yena ku ringana nkarhi wo karhi, kutani a hundzuluka kutani a etlela hi rimbambu lerin’wana. Wanuna un’wana a fanele ku hluvula swiambalo swa yena. Kutani oho, ku na swilo swo tala ngopfu leswi va nga swi endla ku kombisa xikombiso lexi a va hanya eka xona. Nakona sweswi ha swi tiva leswaku Xikwembu lexi nga endla matilo na misava, kutani—kutani xi andlarisa xisweswo ntirho wa Xona leswaku Xi ta hlamusela nkarhi wa Xona hi xikombiso, Xikwembu lexi fanaka xa hanya namuntlha. Swingaleswi hi fanele ku va, swin’wana . . . Tani hilaha hi vonaka e—e nkarhi lowu hi hanyaka eka wona, ku fanele ku ri na nchumu wun’wana lowu munhu un’wana a wu honisaka, kun’wana. Wa vona? Hikuva Xikwembu a xi nga ta pfuka xi pfumelerile swilo leswi ku va swi humelela handle ka ku hi nyika xikombisa xo hetiseka, leswaku laha, leswaku—leswaku hi ta twisisa.

³⁶ Sweswi hi lowu nchumu namuntlha, leswaku vafundhisi, a hi wu hlayi kahle. Swi tanihi laha a swi ri xiswona khale, a va nga ehleketi leswaku a ku ri nkarhi. A va—a va ehleketa leswaku a va hanya hi ku rhula khale, swingaleswi a va nga langutelanga Mesiya. Nakona Yesu u urile leswaku ku Vuya ka Yena ku ta va tanihi “khamba ni vusiku,” laha—laha vanhu va nga ta va va nga ri na vutivi hi ku Vuya ka Yena. Kambe ku vile na vanhwennyana van’wana lava va nga ya va ya hlangana na Yena, hafu ya vona, a va ri na mafurha etimbonini ta vona nakona a va lunghekile; a va languterile xikombiso xexo. Nakona valava hi lava ndzi vulavulaka na vona vusiku lebyi, wa vona, eka lava va languteleke xikombiso sweswi, xikombiso xa ku Vuya ka Yena.

³⁷ Swikombiso leswi nyikiwaka, hi Hosi, swi nyikiwa ntsena eka vapfumeri. Lava va nga pfumeriki a va kali va swi vona. Swi hundza hi le henhla ka vona, nakona a va swi voni. Kutani sweswi, ntsena ku va ntiyiso tanihi laha swi nga vaka hakona leswaku Ntsumi ya Xikwembu yi nga yima eka platifomo leyi vusiku lebyi, ntsena ku va ntiyiso tanihi laha—hilaha ndzi mi langutiseke, nakona ndzi nga va ndzi yi langutile; kumbe mi nga va mi yi langutile mi nga yi voni, kumbe ndzi yi langutile nakona n’wina mi nga yi voni. Sweswi, ma swi tiva leswaku sweswo i swa Matsalwa; walowo hakunene i Ntiyiso. Va vonile . . . Ma swi tiva leswaku Paul u werile ehansi, kambe va . . . a ku ri hava na un’we wa vona loyi a ta vona Rivoni leriya.

³⁸ Rivoni leriya a ri ri kwalahaya loko Yohana a yimile lahaya emahlweni ka mintshungu, na magidi-gidi ya ri kwalahaya

ribuweni, ya vafundhisi na—na tintlhарhi, vavanuna lava kulukumba. Kutani Yohana u vurile, hi yexe, leswaku a ri na vumbhoni bya ku vona Moya wa Xikwembu wu ri karhi wu xika kukotisa tuva kutani wu xikela ehenhla ka Yena, kutani Rito ri ku, “Loyi i N’wana wa Mina loyi a rhandzekaka loyi eka Yena ndzi tsakelaka ku tshama kona.” Nakona a ku na loyi a nga Swi vona handle ka Yohana. Wa vona? A ku ri swa yena ntsena.

³⁹ Xana ma swi xiyisisa hilaha a xi vangama hakona, xikombiso xa tintlhарhi ta vavanuna? Tilangutisile, a ku ri na... A ti ri Vaheveru. A ti nga ri vativi va tinyeleti va le India, a ti ri Vaheveru; hikuva a ti ri kwalahaya etikwени leriya ti ri karhi ti dyondza ntivo-tinyeleti, ku hetisa tidyondzo ta tona. Kutani loko ti ri...ti langutisile ku kongoma eYerusalem, nakona hi ku tiva leswaku ti vonile tinyeleti letiya tinhарhu ku suka eka yin’wana na yin’wana ya tindlela ta tona—tona ta ku tswariwa, ta Kam, Shem, na Yafet, ku nga tinxaka leti a ti huma eka tona, yin’wana na yin’wana, kutani ti vonile tinyeleti eka tindlela ta ku tswariwa ka tona. Xexo a ku ri xikombiso eka tona, leswaku loko tinyeleti letiya ti longolokile, Mesiya a ri emisaveni.

⁴⁰ Oho, mina! A swi hlamarisi ku va ti tile, “Xana Yi kwihi? Xana Yi kwihi Hosi ya Mayuda leyi tswariweke? Hi vonile Nyeleti ya Yona hi le Vuxeni, kutani hi tile ku ta Yi gandzela. Xana Yi kwihi?” A ti swi tiva leswaku ricece leriya Mesiya a ri etele kun’wana, hikuva Xikwembu a xi ti nyikile xikombiso xa nkarhi, leswaku munhu na Xikwembu a swi ri karhi swi hlangana kun’we. I vun’we bya njhani, loko Xikwembu xi tihlanganisile Xona hi xoxe emirini wa munhu! Nkoka lowukulu, ku hlangana loku kulukumba ko tlula ku hlangana hinkwako loku ku nga tshama ku endliwa, a ku ri loko Xikwembu xi hlangana na munhu; kutani xi sukela ntshikelelo wa Xona—Xona lowukulu wa ku va Xikwembu kutani xi ndlandlamuxela tende ra Xona emahlweni kutani xi teka vumunhu, ivi xi hundzuka un’wana wa vona, ku va kutsula. Vun’we. Sweswo i yini? Sweswo swi tisile ku rhula exikarhi ka Xikwembu na munhu hi masiku. Hilaha hi khensaka hakona.

⁴¹ Kutani swikombiso a swi rhumeriwanga... Sweswi ntsena ehleketa ni, munhu un’wana na un’wana, na hinkwavo vativi va tinyeleti; vanhu, hi masiku lawaya, swikomba-nkarhi swa vona a ku ri ttinyeleti. A ku ri na murindzi loyi a ya ehenhla ka—ka xihondzo, kutani a ta ya le henhla a fika a langutisa. Kutani a vona loko ttinyeleti to karhi ti ri hi mintlawa, loko ti ri karhi ti hundza, a swi tiva leswaku a ku ri nkarhi muni. Ma tsundzuka eMatsalweni, “Xana i nkarhi muni, murindzi?” Kutani murindzi a vuya a ta n’wi byela leswaku a ku ri awara muni. Wa vona, a va hlayisa nkarhi hi ttinyeleti.

⁴² Sweswi, xana a swi hlamarisi ku va ttinyeleti leti ti longolokile eka vavanuna vanharhu nakona ku nga vi na un’wana loyi a swi voneke? Wa vona? Ntsena ku longoloka.

Sweswi, mi nga ha longolokisa xisweswo na Matsalwa. Wa vona? Loko tnyeleti letiya ti vile na vun'we, ti hlangana eka ntlawa lowu wa tnyeleti, vavanuna vanharhu na vona a va hlanganile hi nkarhi wun'we. Nakona mi nga ha hlanganisa xisweswo na Xikwembu, eRitweni ra Xona, kukondza swilo leswi swi humelela swi va kona, nakona mi nga swi vona na ku swi tiva leswaku swi ntiyiso. Wa vona? Xikombiso xa nkarhi! Mi nga ha langutisa kwala ehenhla ka xona, mi ku, "Ahaa, i miharihari!"

⁴³ Kambe eka *n'wina* a hi miharihari. Eka *n'wina*, mi hlanganile na Rito, nakona hi Leri. Kutani hakunene-nene i—i Rivoni, Makwerhu Pat, loko—loko—loko—loko u vona xikombiso lexi xi hlangana na mupfumeri. Nakona yaloye hi loyi ndzi kongomisaka eka yena, i mupfumeri, hikuva loyi a nga pfumeriki a nga kali a swi vona. Kutani a ku ta va ku ri xitshinyo muni loko A ri kona emisaveni namuntlha, eka vo tala va vafundhisi va hina namuntlha, lava va nga kotiki ku hlaya xikombiso lexi; swikombiso leswi hi swi hlayaka hi masiku kwala etabernakeleni, na ku vona swilo swa kona. Kutani van'wana va le ku swi hlayeni na ku vona voko leri nga tsala ekhumbini, hambiswiritano vo tala va swi honisa, nakona a va swi voni na swintsongo. A hi nchumu eka vona na swintsongo; a va swi xiyisisi.

⁴⁴ Sweswi xiyisisani, leswaku eka leswi, leswaku U—U kombisile swikombiso swa rixaka. Sweswi, loko va N'wi vutisile hi mayelana na leswi, a va lava swikombiso; kutani U va nyikile swikombiso leswi swi nga humelela. Nakona a va lava ku tiva leswaku ku hela ka misava ku ta va rini, xana ku ta va yini xikombiso eku heteleleni. Kutani U va kombile tindhawu to tala eMatsalweni hi mayelana na swikombiso swa rixaka, mayelana na xikombiso xa tilo ematilweni, na xikombiso xa le misaveni; U va nyikile swikombiso, xikombiso, swikombiso, ntsena ku tshamela ku va xikombiso. Kutani loko... A ta va byela lahaya eka ndhawu yin'wana hi mayelana na xikombiso xa rixaka. U te, "Loko mi vona matiko," wa vona, "ya sungula ku hlengeletana eYerusalem," wa vona, kutani ha swi tiva leswaku nkarhi wa ku karhateka ka vona wu le kusuhi, "loko mi vona Yerusalem ri rhendzeriwile hi mavuthu."

⁴⁵ Sweswi, loko va nga se endla leswi, Xikwembu... misava a yi fanele ku hlangana. Tito, ndhuna leyikulu ya Murhoma, a yi fanele ku hlanganisa mavuthu ma yona kun'we na ku hlengeletana, endzhaku ka loko Mayuda ma ta va ma arile xikombiso lexi nyikiweke hi Xikwembu xa nkarhi eka vona. Walowo i nkarhi lowu Tito a nga hlanganisa mavuthu ma yena kun'we, kutani a ta ku ta teka doroba. Xo sungula a ku fanele ku va na ku hlangana ka vanhu va Xikwembu (va vuriwa tano) ku lwisana na Rito ra Xikwembu, loko tiko ri nga se tihlanganisa ku lwisana na vanhu va Xikwembu. Wa vona, e—e—e vun'we, ku hlangana; ku hlangana kun'we.

⁴⁶ Ndzi pfumela leswaku hi hanya enkarhini wa ku hlangana loku ku kulukumba. Ndzi le ku vekeni ka mavoni lawa yo tshwuka ehansi, na swikoweto leswo hatima na hinkwaswo (swa vavasati, hilaha va endlaka hakona; na vavanuna, hilaha va endlaka hakona; na tikereke, hilaha ti endlaka hakona), ku kombisa eka ntlawa wuntsongo lowu, hi mbilu ya mina hinkwayo, leswaku ndza pfumela leswaku hi longolokile entileni wa Rito ra Xikwembu eka awara leyikulu ya vuprofeta, ntsena loko ku nga se fika ku Vuya ka Hosi Yesu; ku hlangana kun'we na ku lungheka.

⁴⁷ Sweswi, ma swi vona, loko Tito a nga se hlanganisa matiko ya... mavuthu ma yena kun'we, Israel yi hlanganile kun'we kutani va tivumberile ntlawa, leswaku va ta ka va nga pfumeli ku va Yesu a ri Mesiya. Va N'wi arile, na ku N'wi hlongola, na ku N'wi vamba. Kutani, loko va ta va va arile ku ponisiwa loku a ku rhumeriwe eka vona, va hlanganile kun'we ku va va swi endla. Sweswi, khomani sweswo emiehlekeweni: ku va va hlangana kun'we, ku ala Hungu ra awara! A va fanele ku endla sweswo. Kutani loko va ta va va swi endlile sweswo, kutani xikombiso xa rixaka xi nghenile.

⁴⁸ Matiko ma sungurile ku hlangana kun'we, nakona Tito u tisile vuthu lerikulu ra Marhoma na Magiriki kutani va rhendzela makhumbi ma Yerusalem, va pfalela vanhu lavaya kwale ndzeni, kutani va sikela ro fa. Va dyile mahanti ya minsinya. Josephus, mutivi lonkulu wa matimu, wa hi byela. Nakona va dyile byasi ku suka ehansi. Va byabyamisile hambi ku ri n'wana wa un'wana kutani va n'wi dya; wa vona, tanahi loko va ri vanhu lava hlanganeke tinhloko. Kutani loko, eku heteleleni, Tito, a tshamile ehenhla ka xiganga, kwale Yerusalem lahaya, nakona—nakona vanhu lavaya kwalahaya a va ehleketa leswaku a va endla ku rhandza ka Xikwembu, loko va vona mavuthu lawa ya ri karhi ya macha ya nghena. A va arile ku yingisa loko Hosi liya yi Kulukumba, Hosi Yesu, yi va byela sweswo.

⁴⁹ A ku ri hava na Mukreste na un'we loyi a nga khomiwa kwalahaya, hikuva a va vonile xikombiso ivi va huma. Wa vona? Va te, "Lava va nga exihlungwanini xa yindlu va nga tshuki va enhla, kumbe loyi a nga emasin'wini a nga tlheleli endzhaku, a nga teki baji ra yena; kambe a balekeli eYudiya, khongelani leswaku ku baleka ka n'wina ku nga vi hi vuxika kumbe hi Savata." Hikuva, hi vuxika, e—e swiganga swi nga va swi tele gamboko; naswona hi siku ra Savata, rivanti—mavanti ma ta va ma pfariwile, nyangwa, kutani va ta kumeka eka xiyimo xexo. Wa vona? Hi lava ku nghena eka sweswo ku nga ri khale hi mayelana na... hilaha Xikwembu xi endlaka swilo sweswo hakona, loko Hosi yi swi rhandza.

⁵⁰ Xiyisisani sweswi, Yena... Va khongerile ku ri swi ta va leswaku... swi nga vi hi ndlela yaley, Yesu u va byerile ku va va khongelela sweswo, nakona a va khomanga na un'we wa

vona kwalahaya. A va fambile hikuva a va langutile xikombiso, nakona a va fambile; hi sweswo ntsena leswi a swi ri kona eka swona.

⁵¹ Oho, hilaha tikereke namuntlha a ti fanele ku va ti vona xikombiso xa nkarhi lowu hi hanyaka eka wona! Balekani hilaha mi nga kotaka hakona ku ya eXihambanweni, hikokwalaho ka Vutomi; ku nga ri eka kereke yo karhi, kambe eka Yesu Kreste. Hlanganani na Yena, naswona ku nga ri eka vandla ro karhi kumbe nawu wa kereke yo karhi. Hlanganani na Kreste, kutani mi va na ntiyiso leswaku hi Yena. Mi nga ka mi nga teki swin'wana na swin'wana, mi fanele ku va na ntiyiso leswaku hi Yena. I nkarhi wa vun'we njhani!

⁵² Sweswi, hi kuma leswaku va arile Mesiya kutani va tihlanganisa kun'we na ku timpfapfarhutela nhlangano, na ku endla e-e... xiringanyeto exikarhi ka vona leswaku loko munhu wihi kumbe wihi a amukela Yesu tanahi Muprefeta, leswaku u ta tsemiwa ekerekeni. Ma ha n'wi tsundzuka mufana wa bofu loyi a tshamile na matihlo lawa ya nga voniki? Kutani vadyondzisiwa va ku, "Xana ku dyohile mani? Yena, kumbe tata wa yena, mana wa yena?"

⁵³ Kutani Yesu a ku, "Eka mhaka leyi, a hi munhu; kambe leswaku mintirho ya Xikwembu yi ta endleka, yi tivisiwa."

⁵⁴ Nakona tsundzukani, ku vuriwile leswaku tata wakwe na mana wakwe a va swi vulanga. Va te, "Ha swi tiva leswaku loyi i n'wana wa hina, kambe a hi swi tivi leswaku u horisiwe njhani." Hikuva Mayuda a ma vurile leswaku mani na mani loyi a N'wi hlambanyaaka ku va a ri Muprefeta, leswaku u ta tsemiwi.

⁵⁵ Kambe, ma swi vona, mintirho ya Xikwembu a ku ri leswaku mufana loyi a nga weli eka ntlawa walowo. Kutani u te, "Sweswi, i nchumu lowu hlamarisaka eka mina ku va mi nga ku tivi laha Munhu loyi a humaka kona, hambiswiritano U ndzi hanyisile mahlo." Wa vona? Sweswi, a kota ku swi vula. Wa vona, yaleyo a ku ri mintirho ya Xikwembu. A horisiwile, na ku hanyisiwa, nakona a kota—a kota ku swi vula hikuva a nga ri na tingoti leti a ti n'wi bohole ku suka kun'wana. A ku ri yena loyi mintirho a yi endliwile eka yena, naswona hakunene u vonile swa yena... ro sungula evuton'wini bya yena.

⁵⁶ Sweswi, Mayuda ma hlanganile ku lwisana na Yesu na—na ku lwisana na Vumesiya bya Yena, na Hungu ra Vumesiya bya Yena. Hi vona nchumu lowu fanaka wu ri eku humeleleni sweswi, ntsena nchumu lowu fanaka. Xikhomonisi xi le ku hlanganeni ku onha kereke, nakona ndlela yin'we ntsena leyi xi... sweswo hi le ndzhaku ka loko kereke yi tihlanganyetile na yona, eka Huvo ya Tikereke, Huvo ya Tikereke ta Misava, ku alela na ku onha Hungu, Rito! Va arile Rito, tikereke ti swi endlile! A va nge Ri amukeli hikuva Ri lwisana na nawu wa kereke ya dinominexini ya vona; swi nga ri na mhaka leswaku i mangani Malangavi

ma Ndzilo lawa ya nga lengalengaka eka hina...exikarhi ka vanhu, kumbe i vanhu vangani lava...i swilo swingani leswi nga ta vhumbhiwa kutani swi humelela, na hinkwaswo swikombiso leswikulu leswi A nga swi tshembhisa hi siku ro hetelela; va nga ka va nga swi endli.

⁵⁷ Hikokwalaho, va le ku hlanganeni sweswi, naswona mufundhisi wa n'wina lahwani na vo tala va nga mi byela, lava nga eku hlayeni, leswaku va le...na pfhumba ro kondletela vun'we bya tikereke ta e—e—e misava. Kutani e...ku na muministara wa Muluthere ehenhla ka swona. Leswaku, loko ko ta khombo, ri ta humelela endhawini ya kwala kusuhi; loko hi nga tihlanganisanga na pfhumba lero ro kondletela vun'we bya tikereke, kutani kereke ya hina yi nga ka yi nga ha vi kereke, nakona va nga yi tirhisa tanihi yindlu yo hlayisa nhundzu. Kumbe loko un'wana wa hina vaboti a nga vona munhu un'wana a ri eku feni kumbe ku vaviseka, nakona a ringeta ku ministara nkateko wun'wana na wun'wana wa Ximoya eka yena, hi nga ha baleseriwa hikokwalaho ka swona; hi swona ngopfu sweswo. Hi nga ha nyikiwa khume ra malembe ekhotsweni ra nhlanganelo wa matiko hikokwalaho ka ku ministara xin'wana na xin'wana, hikuva a hi xona xirho xa pfhumba leri ro kondletela vun'we bya tikereke. Xana a mi wu voni mfungho wa xivandzana-ke? Wa vona? Wa vona?

⁵⁸ Sweswi, hi vona nkarhi lowu wa ku hlangana wu ri eku teni. Wa vona? Sweswi, vonani! Kutani kereke yi tihlanganyetile ku lwisana na Hungu; kutani loko yi endla sweswo, matiko ma le ku tihlanganyeteni hi Xikhomonisi ku onha kereke nakambe; ntseña leswi xi nga swi endla eku sunguleni. Wa vona? Xa tivuyelerisa xona n'winyi nakambe.

⁵⁹ Israel a ri fanele ku sungula ri ala Hungu. Kutani loko ri ta va ri arile Hungu, kutani masocha, vutomi bya rixaka byi tihlanganyetile hi byoxe kun'we (bya matiko man'wana), ivi byi nghena byi ta onha kereke. Kutani namuntlha, va arile Hungu ra Hosi Yesu, nakona va Ri arile. Kutani sweswi, nkarhi wu fikile laha Xikhomonisi xi nga eku hlanganyeteni ka misava kun'we ku lwisana na kereke. Wa vona, swi fanele ku va hi ndlela yaleyo. Sweswi, swa tika ku vula sweswo.

⁶⁰ A swi tika eka vona Mayuda ku pfumela. Va te, "Sweswi tanani, vamakwerhu, ha swi vona leswaku—leswaku Xikwembu xa hina—xa hina xi na hina, swingaleswi hi ta—hi ta nghena etempeleni. Kutani sweswi hi ta khongela, ivi hi pfumelela fada lowo kwetsima *Swingere-ngere* na fada lowo kwetsima *Swingere-ngere* a hi rhangela hi xikhongelo. Pfalani nyangwa!" Kutani Tito a yima, nakona u yimile kwalahaya ku ringana lembe kumbe ku tlula. Wa vona, a rindzile kwalahaya, na ku va sikisa. A ku ri hava na un'we wa vona loyi a ta humela ehandle ka doroba; kutani va file, va sika. Kuteloko a nghanile kwalahaya ivi a handzula makhumbi, ngati yi tlhamukerile ehandle yi

khuluka kukotisa milambu ehansi laha a nga dlaya hinkwaswo leswi a swi ri kwalahaya.

⁶¹ Sweswi, Ntsumi ya Hosi yi swi profetile sweswo, le ndzhaku eka Testamente ya Khale, na ku vula leswaku sweswo a swi ta humelela. Kutani tiministara leti, a ti ri vafundhisi, lava a va fanele ku rhumeriwa eka sweswo na ku byela vanhu sweswo; ematshan'wini ya sweswo, loko Yesu a yima exikarhi ka vona, a va kalanga va N'wi tiva; na ku ringeta ku endla e—e... swin'wana swa muxaka wa e—e xinengani xa mpfundlha, "Hi endleli salamus, u nge hi vona hilaha—hilaha swi endliwaka hakona! Hi kombeti xikombiso." Wa vona?

Kutani A ku, "Ndzi . . ." Hikokwalaho ka yini, U endlile swilo swo tala ngopfu, hambiswiritano a va nga swi voni. Wa vona? Kutani loko va N'wi arile tanahi wa vona . . . Hungu ra siku lero, va arile Hungu ra siku lero.

⁶² Va tsandzekile ku vona xikombiso xa siku lero. Nakona xikombiso xa vuprofeta bya—bya Bibebe xi endliwile emahlweni ka vona, nakona va te, "A hi ngheneneni sweswi!" Vona a va ri vavanuna vo kwetsima. A va ri vavanuna lava a wu nga ta tlhandleka rintiho ra wena ehenhla ka vutomi bya vona. A va nga ta va *sweswo*, kutani—kutani ku va e—e—e muprista. Muprista a ta dlayiwa, a ta khandliwa a fa hikokwalaho ka xin'wana na xin'wana. Swingaleswi a fanele ku hanya byo basa, vutomi byo teng. A nga ta swi endla, hikuva a khandliwa hikokwalaho ka xin'wana na xin'wana. Nakona sweswi a va ri vavanuna va kahle, na vavanuna vo kwetsima emahlweni ka vanhu, hambiswiritano va nghenile va fika va ku, "Sweswi, hi ta . . . Hi na Xikwembu, Xikwembu lexi nga va na hina eka tinguva hinkwato. Hi ta ya nghena etempeleni ya Xona yo kwetsima." Yaleylo a yi ri tempele yo kwetsima ya Xikwembu! Kambe, ma swi vona, U ariwile etempeleni ya Yena yo kwetsima. Wa vona? "Hi ta ya nghena endlwini ya Hosi. Sweswi hinkwenu n'wina Vaheveru ma swi tiva leswaku hi hina rixaka leri nga hlawuriwa, hi hina, lahwani. Naswona Xikwembu i Xikwembu xa hina; Xikwembu xa Abraham, Isaka, na Yakobo. Xi na hina. Xi ta hi ponisa eka Vafilista lava nga yimbangiki lava va nga le handle (tani hilaha a swi ri xiswona), Marhoma na Magiriki. Xi ta hi ponisa eka sweswo. A hi ngheneneni endlwini ya Hosi!"

⁶³ Sweswo swi twala swi ri kahle; kambe xana va endlile yini? Muaki wa yindlu a ri le ndzeni, hi xivumbeko xa muvantli wo soleka wa Mugaleliya, kutani va N'wi arile; loko Xikwembu xi N'wi kombisile ku va a ri Murhumiya wa Xona wa awara, na Rhavi. Kutani va Ri arile. Swingaleswi hinkwako ku khongela, hinkwako ku tshembheka, hinkwawo magandzelo ma vona a ma nga vuli nchumu eka Xikwembu. A va swi endlile! Kutani Xikwembu xi pfumelerile vuthu leriwani lerikulu ri hlangana ku va ri yi onha.

⁶⁴ Kutani ha swi vona namuntlha, tanihi leswi tikereke hi tidinominexini na swin'wana, ti nga eku aleni ka Rito ra Xikwembu. A va swi lavi ku va mi va byela hi mayelana na swilo leswi, nakona sayense yi nga swi khorwisa hi swifaniso na hinkwaswo, nakona hambiswiritano a va lavi nchumu xo xi endla hi Rona. Swingaleswi xikhomonisi xi le ku vumbekeni ku va xi yi onha, ntsena tanihi laha Tito a nga endla hakona, nakona Bibele yi vurile leswaku va ta swi endla. Hakunene!

⁶⁵ Sweswi, ma ku vona laha hi hanyaka kona? I nkarhi wa ku hlangana, loko hi vona swilo leswi swi ri karhi swi hlanganisiwa. Oho, hikokwalaho ka yini hi tsandzeka ku vona swilo leswi? Mi nga ha—nga ha langutisa lahawani eMatsalweni kutani mi vona laha A nga tshembhisa sweswo, leswi A nga ta swi endla. Sweswi, ha swi vona swi ri karhi swi humeleta. Ha swi vona ekerekemi leswi A nga tshembhisa ku swi endla; ha swi vona swi ri karhi swi humeleta. Ha ma vona matiko ma ri karhi ma hlangana kun'we. Ha ti vona tiisms ti ri karhi ti hlangana kun'we. Ha ti vona tikereke ti ri karhi ti hlangana kun'we. I nkarhi wa ku hlangana. I awara ya ku hlangana. Walowo i moyo wa nguva, "Hi fanele ku hlangana." Hinkwaswo leswi mi vulavulaka hi swona swi fanele ku kondleteriwa; hambi wuri mfumo wu nga ka wu nga swi amukeli.

⁶⁶ Ma swi tiva, tanihi muaka tiko...Ndzi nge swi koti tanihi muaka tiko, tanihi muaka tiko wa United States, hambiswiritano ndzi—ndzi...mi nga ha ndzi nyika cheke ya ntlanhu wa tidolara naswona ndzi nga ka ndzi nga ringeti ku veka vito ra mina eka yona. Hmm. Wa vona, ndzi nga ka ndzi nga swi endli. Wa vona, i nkarhi wa ku hlangana. Wu fanele ku hundza eka vun'we bya muxaka wo karhi, nakona vun'we byebyo hi byona nchumu lowu tisaka mfungho wa xivandzana. Wa vona? I nkarhi wa ku hlangana, nakona wu le ku tirheni ku ya ehenhla ka sweswo. Mi nga ha swi vona ntsena hi matihlo ma n'wina ma nyama, loko mo swi langutisa. I nkarhi wa ku hlangana, laha hinkwaswo swi nga eku hlanganeni.

⁶⁷ Muyuda—Mayuda ma tihanganyetile ku lwisana na Yesu, tanihi Mesiya wa vona—vona. Hikokwalaho, hi vona leswi nga humeleta. Hi vona nchumu lowu fanaka sweswi, xikhomonisi xi ri karhi xi hlanganyetela ku onha kereke, endzhaku ka loko kereke yi hlanganile eka Huvo ya Tikereke ta Misava na ku ringeta ku hlasela Hungu, Rito ra Xikwembu. Va ringeta ku Ri cukumeta. Nchumu wun'we ntsena lowu va nga wu endlaka i ku timpfapfarhutela huvo, hikokwalaho ka leswi va nga avana; ntlawi lowuntsongo lahawani, Mamethodist, na Mabaptist, na Malutheran, na Mapresbyterian, Church of Christ, na tin'wana to kota teto. Va nga ka va nga endli nchumu, hikuva *loyi* u ta va a lwisana na *loyi*, *loyi* a lwisana na *loyi* un'wana, tidyondzo ta vona ti hambanile kukotisa hilaha vuxa byi nga hambana hakona na vupela-dyambu. Wa vona, va nga ka va nga swi koti. Kambe loko

va va kun'we, ehansi ka nhloko yin'we leyikulu, va swi kumile. Va ta va va swi kumile.

⁶⁸ Yaleylo hi yona ndlela leyi Makhatholiki va nga na vun'we hakona, Roman Khatholiki, hakunene va na vun'we, va le... vo tala i Roman Khatholiki; Magiriki na Makhatholiki laman'wana a—a va talanga kukotisa Roman Khatholiki. Sweswi va hlangana kun'we, nakona xexo hi xona xivangelo xo va va yima swin'we. A swi na mhaka leswaku ku humeleta yini, phophu liya i nhloko ya hinkwaswo. Wa vona? Nakona a swi na mhaka leswaku munhu un'wana u ri yini, "Hi yena loyi a nga hoxisiki; hi yena—yena—yena mupfuni wa Xikwembu, hi sweswo ntsena; u le kusuhi na Xikwembu; u na matimba ehenhla ka tihele, Matilo, na xivandla xa ku basisa vanhu." Wa vona? Swingaleswi ku hava nchumu lowu nga endliwaka eka mhaka *yaleylo*; swin'wana na swin'wana leswi a swi vulaka, sweswo hileswi swi faneleke ku famba.

⁶⁹ Sweswi, Maprotestant ma le ku tiendleleni ka nhloko yo kotisa yaleylo, leyi fanaka. Nakona xana Bibebe a yi swi vuli leswaku a ku ri na xifaniso lexi nga endleriwa xivandzana? Xana i yini xifaniso? I nchumu wun'wana wo fana na xona, lowu nga endliwa ku fana na xona. Hi sweswo, i nchumu wun'we. Xana i yini? Hi ku tihlanganisa kun'we hi voxé, nakona lowu hi wona moyo wa nguva, i ku *hlangana*.

⁷⁰ Ku hlangana kun'we sweswi, ku ringeta ku onha Hungu. Xana va Ri onha njhani? Xana va nga ri onha njhani Rito ra Xikwembu? Va nga ha Ri endla leri nga riki na matimba, leri nga riki na matimba, hi ku teka mindhavuko kukotisa hilaha va nga endla hakona le ndzhaku eku sunguleni, kutani va endla Rito ra Xikwembu ri va leri nga riki na matimba. Wa vona, va ri, "Oho, sweswo i... Hakunene, endzhaku ka hinkwaswo,..." Ma ku vona laha wansati loyi wa muhedeni a ringetaka ku... u... Ndzi rivele leswaku vito ra yena i mani sweswi; loko ntsena a ndzi kota ku ri vula. U... Ndzi le ku ringetenka ka ku ehleketa hi swona swonghasi.

⁷¹ A ndzi ri karhi ndzi ehleketa hi Manana Rixaka loyi siku rin'wana; ndzi navela ingaku a hi ri na un'wana wo tanishi yaloye ku va a pfuka. A ku ri yena loyi a nga ya etibarheni a fika a handzulela titlothotho, kutani a cukumetela swikombiso ehandle na hinkwaswo kukotisa sweswo. Hikokwalaho ka yini wansati un'wana a nga pfuki namuntla kukotisa sweswo, kutani a huma lahwani a ya handzulela swin'wana swa swifaniso swa vavasati lava nga ambalangiki va rixaka ra yena n'winyi, na swilo swo kotisa sweswo? Leswaku, va nga ha vi na swona na kan'we.

⁷² Sweswi, kambe wansati loyi, wa muhedeni, loyi a nga vula leswaku—leswaku "Bibebe a yi le nawini, ku va yi hlaiyi eswikolweni swa mani na mani," na swin'wana swo kotisa sweswo.

⁷³ Sweswi vona nakambe, xana mi kale mi swi xiyisisa nakambe, va le ku ringetenka ku vula sweswi, na vadyondzi lavakulu va Matsalwa, va vula leswaku “vunyingi bya vuprofeta lebyi byi nga profetiwa eBibeleni hakunene a byi hoxekile, nakona a byi kalanga byi humelela.” Nakona mi twile hi sweswo na ku swi hlaya. Kutani va le ku ringetenka ku vula hinkwaswo; ma swi vona, va le ku ringetenka ku onha matimba ma Rito lero. Loko ntsena vo onha na ku Ri siva hi nawu wa kereke kumbe xin’wana lexi vanhu va nga na xona, lexi xi tikombaka ematihlweni ma vona xi antswa ku tlula Rito, kutani va Ri onha hi ndhavuko wa vona—wa vona. Nakona sweswo hilaha va nga eku ringetenka ku onha Rito ra Xikwembu hakona, swi hi tipolotiki ta xidinominexini.

⁷⁴ Sweswi, kereke yin’wana na yin’wana yi na tipolotiki ta yona n’winyi. Church of Christ yi na ta yona, Christian church yi na ta yona, na Mabaptist, na Mamethodist, na Mapresbyterian; hinkwavo va na tipolotiki ta vona to hambana-hambana. Sweswi, va le ku yeni ekule na sweswo hikuva va avanile. Wa vona, a swi nga ta swi kota eku sunguleni, va fanele ku swi endla sweswi. Wa vona, lowu i nkarhi wo hlangana, nakona sweswi hinkwavo va le ku swi vekeni kun’we ivi va swi hlengeletela ehenhla na ku vona leswaku va huma na yini. Mina, swi fana na ku baka lofo ra xinkwa ku suka eka nyama ya hanci, na thyaka ku suka eka thini, na hambi ku nga va yini swin’wana leswi a va ri na swona kun’we; kutani va swi gandla swin’we, na ku chela mazambhala yo bola na swin’wana kun’we, kutani u vona leswi u nga ta huma na swona. Hakunene a ndzi lavi na xin’we xa swona. Ee, nkulukumba! Yaleylo i ndlela leyi va nga eku swi endleni hakona. Wa vona, va le ku tekeni ka vanhu lava va pfumelaka leswaku Yesu a ri ntsheketo, kereke leyi yi pfumelaka leswaku Yesu a ri ntsheketo; leyin’wana, van’wana va pfumela leswaku A ri Muprofeta.

⁷⁵ Yin’wana yi ri, “Masiku ya mahlori ya hundzile.”

⁷⁶ Leyin’wana yi ku, “Ku nga ha va ku ri na nchumu wo tano.”

⁷⁷ Kutani leswi hinkwaswo kun’we; nakona Bibele yi te, “Xana vambirhi va nga fambisa ku yini swin’we va nga pfumeelananga?” Wa vona? Sweswi, walowo u muxaka wa vun’we lebyi va nga na byona. Nakona va na fada wo kwetsima lonkulu wo n’wi veka ehenhla ka swona, kutani kwalaho mi na xifaniso eka xivandzana, ntsena leswi Bibele yi swi vulaka. Sweswi va na muministara wa Muluthere, nhloko ya swona. Kunene, ha swi vona leswaku i nkarhi wa ku hlangana. I nchumu wun’we na sweswi, Xikhomonisi na hinkwaswo swi le ku hlanganeni kun’we; emisaveni, na le kerekene na swin’wana, ku hlangana kun’we.

⁷⁸ Langutisani ntumbuluko. Oho, mina! Ntumbuluko, loko ntsena mi nga langutisa ntumbuluko, wu endla nchmu lowu fanaka. Ntumbuluko i khalendara ya Xikwembu ya swikombiso.

Xana a mi swi tiva sweswo? Yesu u va byerile leswaku va langutisa ntumbuluko. Lwandle ri ta va ri ri karhi ri pfuma, wa vona, nakona ku ta va na swilo swo hambana-hambana, na ku ninginika ka misava etindhawini to hambana-hambana, madzolonga ya tiko, swikombiso etilweni, swikombiso emisaveni, hinkwako ku ta va na swikombiso swa nkarhi lowu nga eku teni.

⁷⁹ Langutisani mapapa. Loko mapapa ma nga se tisa mpfula ya xidzedze, ma swi tiva leswaku yi endlisiwa ku yini? Mapapanyana mangari-mangani ma hlengeletana kun'we, ma endla papa rin'we lerikulu. Kunene, leriwani ri na swimoyana swo karhi leswi swi ri hungaka, lerin'wana ri na swimoyana swo karhi leswi swi ri hungaka, nakona hinkwaswo swi hunga swin'we, kutani ma va na bubutsa. Wa vona? Ma hlangana loko ma nga si va na xidzedze; ma boheka.

⁸⁰ Langutisani masekwa na mapilipili loko ma hlangana kun'we loko ma nga se famba etikweni ra wona. Wa vona? Ma hlangana kun'we. Mi nga ha ma vona loko ma ri karhi ma haha ku suka exidziveni lexi ku ya eka xidziva xexo, ku suka laha ku ya lahaya, hinkwawo ka wona ma ri karhi ma hlangana kun'we. Ma le ku hlanganeni, ma tilulamisela ku suka ka wona. Wa vona, ntsena ko va . . . walowo i ntumbuluko, nakona Xikwembu xi tumbuluxile ntumbuluko, naswona ntumbuluko wu tirha hi makungu ma Xikwembu. I nawu, nawu lowu nga tsariwangiki wa Xikwembu, leswaku ntumbuluko wu tirha hi ku ya hi nawu wa Xona.

⁸¹ Ntsena tani hi, ku vulavula eka ntirho wa nkosi, hi mafi lawa ya rhelelaka esirheni, ehansi ka rimintsu ra nsinya, ku ya tshama kwalahaya kukondza ku fika ku pfuxiwa hi ximun'wana. I nawu wa Xikwembu. Ku hava vuntlharhi lebyi byi nga endlaka leswaku mafi yalawa ya rhelela le hansi; u nga ka u nga ma koki ma humela ehandle, u nga ka u nga ma sengi ma humela ehandle. Ku hava ndlela yo swi endlaka ku antswa ku tlula hilaha Xikwembu xi endlaka hakona. Xikwembu xi na ndlela leyi hetisekeke. Swingaleswi loko tluka ri dzudzeka, kutani Xi rhumela mafi ehansi le ndzeni ka sirha kutani xi ri tumbeta. Tanihi laha Yobo a nge te, "Ndzi fihle esirheni kukondza vukarhi bya Wena byi hundza." Wa vona? Ma rhelela le hansi hikuva i nawu wa ntumbuluko, loko ku nga si va na gwitsi. Vonani matluka sweswi ma sungula ku dzudzeka. Hikokwalaho ka yini? I nawu wa ntumbuluko.

⁸² Masekwa ma hlangana kun'we, hinkwawo ka wona, ivi ma hlengeletana ku rhendzeleka hi murhangeri. Kwalahaya ma ta swi tiva hi ndlela yin'wana, a ndzi swi tivi ku ri ma swi endlisa ku yini, kambe ma swi tiva leswaku nkukunyana luwa wo karhi i murhangeri. Kutani nakulorhi yaloye lontsongo, hinkwawo ma hlangana kun'we ivi ma hlengeletana ku rhendzeleka hi rona, kutani ma tlakukela ehenhla emoyeni. Kutani u ta . . .

a nga se tshama a suka exidziveni xexo sweswi, kambe u ta famba a kongomile eLouisiana kumbe Texas tanahi laha a nga fambaka hakona, ku ya emansin'wini ma rhayisi. Wa vona, loko ma nga se haha ma famba, ku va ma siya kaya ra wona laha ma nga tswariwa kona lembe rero, ma hlangana kun'we. Amen! Hi sweswo; ku hlengeletana ku rhendzeleka hi murhangeri wa wona.

⁸³ Xiphiqo xa kona hi lexi, hi munhu, a nga n'wi tivi murhangeri wa yena. Ina, nkulukumba. Va ta hlengeletana ku rhendzeleka hi dinominexini, va ta hlengeletana ku rhendzeleka hi bixopo kumbe wanuna, kambe va nga ka va nga hlengeletani ku rhendzeleka hi Murhangeri, Moya lowo Kwetsima eRitweni. Wa vona? Va ri, "Oho, kunene, ndza chava leswaku ndzi nga va na ku hisekela etlhelo; ndzi chava leswaku ndzi nga ha rhetemukela enengeni wo hoxeka." Ohooo, hi sweswo! A hi nge xisekwana a xi lo vula leswaku, "Ndzo ka ndzi nga yi tsakeli ndlela ley a hlayisaka tinsiva ta yena hakona. A ndzi pfumeli leswaku ndzi nga n'wi landzela." U ta dlaya hi xirhami. U ta khomiwa kwalahaya, loko u nga suki na ku-na ku haha loko ku famba. Ka tihlanganisa kona hi koxe, nakona ntumbuluko wu endla sweswo.

⁸⁴ Mapilipili ma hlangana kun'we wona hi woxe, ma tihlengeleta ku rhendzeleka hi murhangeri wa wona; ma endla nchumu lowu fanaka.

⁸⁵ Xana mi kale mi ti xiyisia tinyoxi loko ti ri karhi ti rhurha? Tinyoxi ti hlangana kun'we, loko ti nga se rhurha, ku rhendzeleka hi hosikazi. Hi swona sweswo. Kutani laha yi yaka kona, hilaha na tona ti yaka kona. Ina! Xana ti endla yini? Ta hlangana loko ti nga se rhurha. Hakunene; ntumbuluko hinkwawo!

⁸⁶ Tihlampfi ti hlangana kun'we loko ku nga se va na ntsutsumo wa ximun'wana. Le handle elwandle, mi nga ha ti kuma; letikulu...leti hi ti vitanaka "va malundza," tisalmon. Loko ti fika lahaya, loko ntsutsumo walowo wu nga se fika, mi ta ti vona ti ri hi khume xa magidi, kwale lwandle lero, ti ri karhi ti hlengeletana na ku hlengeletana; mati ya munyu, kambe tona ti va ti ri tihlampfi ta le matini yo tengen. Kutani hiloko ti fika ematini lawaya yo tengen, ku ya eka nguva yo tshikela. Ti ya kwalahaya ti ya tshikela, kwalomu ka mune wa malembe man'wana na man'wana, kutani ti fa endzhaku ka ku tshikela. Nakona ta swi tiva leswaku ti ya eku feni lahaya, nakona mi nga ka mi nga ti siveli hi nchumu. Ti nga tlula switepisi swa tihlampfi na hinkwaswo, ku ya kwalahaya, ti ri karhi ti swi tiva leswaku ti ya ekufeni. Kambe nawu wa ntumbuluko wa ti endla, ti ri karhi ti swi tiva leswaku ti ya kwalahaya ti ya tshikela egojini, ivi ti fa. Kutani vana va kona va humelela, ivi swin'wana swi ti hlanganisa kun'we, hiloko ti huma ti kongoma elwandle. I ku

hlangana! I nawu. Ntsena u nga ka u nga wu hluli nawu wa Xikwembu.

⁸⁷ Matiko ma le ku—ku fayekeni, hikokwalaho ka nkarhi lowu sweswi hi swi vonaka leswaku—leswaku ma fanele ku endla leswi. Hi le ka maendlele ma ku pfilunganyiwa ka tiko. Ha swi vona leswaku matiko ma le ku tshoveni ka vuxaka. Lembe na lembe, hi kuma tiko *leri* ri ri karhi ri mitiwa hi xikhomonisi; *leriwani* ri ri karhi ri mitiwa hi xikhomonisi. Nakona kwala tikweni ra hina, ri lemiwile hi xihlenge xa xikhomonisi, nakona xi ta ri vutla! Wa vona, xi ta swi endla, ku hava ndlela yo swi sivela. Hikokwalaho ka yini? I xivangelo xin'we xa ku va mi nga swi kotanga ku sivela Tito. Vanhu va arile Xikwembu na Rito ra Xona. Ina, nkulukumba, swingaleswi va ta swi endla, nakona ha swi vona kwala hi maendlele.

⁸⁸ Mina, hi ntolovelu, ndzi teka tiawara tingari-tingani; sweswi se ndzi fikisile kwalomu ka makume nharhu wa timinetse, kona sweswi. Wa vona? Kambe ku nghenisa swilo leswi hinkwaswo endzeni, ntsena ndzo va eku susumeteleni. Mi swi hlaya loko mi fika ekaya.

⁸⁹ Xiyisisani, va le ku hlanganeni sweswi. Mi ri, "Makwerhu Branham, xana i ntiyiso sweswo?" Va ya eka Nyimpi ya Armagedoniya; hi swona leswi va nga ta swi endla. Wa vona? Nakona va hlanganelu sweswo kona sweswi. Hikokwalaho hi nga na U.N. na hinkwaswo leswi hi nga na swona. Matiko ya le Vupela-dyambu ma le ku hlanganeni ku lwisana na Matiko ma le Vuxeni, xikhomonisi na swin'wana, hinkwaswo swi le ku hlanganeni kun'we. Tikereke ti le ku hlanganeni kun'we. Swilo hinkwaswo swi tikomba swi ri eku hlanganeni. Ku hlangana, ku tihlanganisa kun'we, ha swi vona sweswo.

⁹⁰ Nakona, loko hinkwako ku hlangana loku ka matiko, swikombiso leswi, swikombiso swa matiko, hi swi vona kwala emisaveni, ku ninginika ka misava etindhawini to hambana-hambana, swilo swo hambana-hambana swi ri karhi swi hlangana; swi tisa misava kun'we, swi tisa vanhu kun'we, tikereke hinkwato kun'we, hinkwaswo swilo leswi. Nakona loko ku hlangana loku hinkwako ku ri karhi ku ya emahlweni, ku na ku hlangana kun'wana loku ku yaka emahlweni. Amen! Sweswo hileswi ndzi lavaka ku swi kombisa eka n'wina sweswo.

⁹¹ Xikwembu xi le ku hlanganyeteni ka Mutekiwa wa Xona. U le ku hlanganeni, ku suka eVuxeni ku ya eVupela-dyambu, na le N'wa-lungu na le Dzongeni. Ku na nkarhi wa ku hlangana, nakona wu kona sweswi. Xana U hlanganyetela yini? Ku Vutliwa. Amen! Xikwembu xi le ku N'wi lulamiseleni. Ina nkulukumba, ku hlangana! Xana U hlangana na yini? Na Rito! "Hikuva hinkwaswo matilo na misava swi ta hundza, kambe Rito ra Mina ri nga ka ri nga hundzi." U hlanganisa Yena hi yexe na LESWI HOSI YI SWI VULAKA swi nga ri na mhaka leswaku dinominexini yihi na yihi kumbe munhu un'wana u

ri yini. U tihlanganisa Yena hi yexe. U le ku tilulamiseleni. Hikokwalaho ka yini? Hi yena Mutekiwa. Hi swona sweswo. Nakona u tihlanganisa Yena hi yexe na Muteki wa Yena, wa vona, naswona Muteki i Rito. “Eku sunguleni Rito a ri ri kona, Rito a ri ri na Xikwembu, nakona Rito a xi ri Xikwembu. Kutani Rito ri endliwile nyama kutani ri tshama exikarhi ka hina.”

⁹² Kutani Kereke na Mutekiwa na Rito swi hundzuka swi va un’we, kukondza Rito hi Roxe ri tirha mintirho ya Muteki. Amen! Ma swi vona? Ku hlangana! Ku nga ha ri ku, “Joyina kereke”; ku nga ha ri na *leswi*, kambe balekelani swilo hikwaswo kutani mi bohiwa eka Yesu Kreste. Wa vona? I nkarhi wa ku hlangana. Xikwembu, xi le ku hlanganyeteni ka Mutekiwa wa Xona kun’we, ku N’wi tlherisela endzhaku; ntsena hi kunene. Ku hlanganisa Marito ma xitshembhiso xa Xona.

⁹³ Vatesalonika va vumbirhi, kavanyisa ka vu²; Yi ri, ku avanyisa loku ka vu⁵ kuri, “Vakwetsimi lava nga etlela entshurini wa misava va ta pfuka. Kutani hi ta hlangana na vona (lava va hanyaka, na lava va nga fa), hi ta hlangana loko hi nga se fika ehenhla Lahaya,” hikuva Mutekiwa u ta va a hetisekile loko A fika Lahaya. Lava va hanyaka, lava va tihlanganisaka na Rito, na lava va nga famba va swi endlile khale sweswo; nakona hinkwaswo Swi hlangana kun’we, swi endla vun’we lebyikulu bya ku hlangana loko ku nga se yiwa ehenhla Lahaya. Amen!

⁹⁴ Xikhomonisi xi fanele ku pfuka, swilo leswin’wana swi fanele ku pfuka, kutani kereke yi fanele ku tihlanganisa kwalahaya, loko leswiya...na matiko le handle hikokwalaho ka Huvo ya Tikereke ta Misava; kutani Mutekiwa u fanele ku tihlanganisa Yena hi yexe ehansi ka Rito ra Xikwembu. Kukota ku endla sweswo, Xikwembu xi rhumerile xikombiso xa le Tilweni na swilo, leswi swi khorwisaka eka Kereke, tanahi laha Xi faneleke ku endla hakona eka tiko. Amen.

⁹⁵ Xikwembu; nkarhi wa ku hlangana! Ina, nkulukumba. Oho, mina! Sweswi, tsundzukani, sweswi, ku na ku hlanganisa ka Rito (ku hlanganyetela endzhaku nakambe), ku tlherisela endzhaku “Ripfumelo leri ri nga tshama ri nyikiwa vakwetsimi.” Ku tlherisela endzhaku! Leswaku leswi swi ta endliva ntsena eka siku leri. Nkarhi wun’we ntsena lowu a swi ta endliva hi wona hi sweswi. A swi nga se tshama swi hlaseriwa kun’wana; va sukile va ya eku titlonyeni ka xidinominexini. Kambe sweswi, a swi weli eku titlonyeni ka xidinominexini, hikuva i nkarhi wa ku hlanganisiwa ka vavanuna na vavasati va tinxaka hinkwato, mihlovo hinkwayo, milawu ya kereke hinkwayo, swilo hinkwaswo leswi nga ehansi ka Kreste hi Nkhuvulo wa Moya lowo Kwetsima na ku tlhelela eRitweni.

⁹⁶ Nkarhi wa ku hlangana eka Kereke! Oho, mina! Ku hlanganisa Rito rin’wana na rin’wana leri nga tshama ri hangalasiwa entsungeni hinkwako hi mavandla lawa: hi

mpfhuka ka le Nicaea, Rhoma, loko va kondleterile kereke yo sungula, nakona va kondleterile Luther, va kondleterile Wesley, va kondleterile tikereke hinkwato ka tona. Kutani ku endla tano, a va fanele ku tekelela nawu wa kereke, kutani loko Xikwembu xi rhumela munhu un'wana, a va nga ta Swi amukela. Hikokwalaho, a swi nga koteki ku fika sweswi. Nakona Xikwembu xi tshembhisile, eka masiku yo hetelela, leswaku "Ripfumelo ra vatatana ri ta tlheriseriwa eka Mutekiwa nakambe," leswaku swi ta va hi ndlela leyi, nakona a ku nga ta va nkarhi wun'wana handle ka nkarhi lowu. Vonani leswaku i xikombiso muni ku suka eTilweni, tanahi Langavi ra Ndzilo exikarhi ka hina, na hi swikombiso na swihlamariso swa Hosi Yesu Kreste. Kutani loko A ha vulavula na hina, A Swi kali swi tsandzeka ku va eka thonsi hi ku hetiseka. Amen! Kutani hi vona laha hi yima kona. Nkarhi wa ku hlangana!

⁹⁷ Hi vona matiko ma ri karhi ma hlangana, hi vona misava yi ri karhi yi hlangana, hi vona xikhomonisi xi ri karhi xi hlangana, hi vona tikereke ti ri karhi ti hlangana; naswona hi vona Xikwembu xi ri karhi xi tihlanganisa Xona n'winyi na Mutekiwa wa Xona, kukondza Xona na Kereke ku va nchumu wun'we. Haleluya! Kukotisa phiramidi lahaya. Hi swona! Ku tihlanganisa kun'we vona vinyi; Xikwembu xi ri eku hlanganyeteni! Hikokwalaho ka yini? A swi se tshama swi va kona, hi mpfhuka ka nguva ya kereke yo sungula, ku va Langavi ra Ndzilo ri va exikarhi ka vanhu. A swi se tshama swi va kona, hi mpfhuka ka nguva ya kereke yo sungula, ku va va kala va vona swilo leswi hi nga eku swi voneni namuntlha. Nakona leswi swi endlive leswaku swi koteka loko Xikwembu xi rhumela Swilemo swa Nkombo na ku hi nyika xikombiso hi Swona, na ku rhumela Tintsumi ta nkombo ehansi ku suka eTilweni; kutani ti ta ku ta tlherisela Rito leriya ri nga hangalaka eka tidinominexini, na ku swi boha swi tlhelela eRitweni ra Xikwembu nakambe, ku enhlisa Moya wa Xona lowo Kwetsima.

⁹⁸ Yesu u te, "Loko mi tshama eka Mina na Rito ra Mina ri tshama eka n'wina, kutani kombelani xin'wana na xin'wana lexi mi xi lavaka, mi ta endleriwa xona." Ku hlanganisa Mutekiwa a tlhelela eRitweni nakambe, leri ri nga Xikwembu. Kereke na Rito, ku nga ri Kereke na nawu wa kereke, Kereke na Rito; Mutekiwa na Rito swi hlanganisiwe kun'we. Oho, mina! Xana i... Ku tlherisela yini? Ripfumelo ra vatatana va xiviri va xipentekosta, wa vona, lava va nga hangalasiwa hi ntlawa wa Luther. Ku nga ri Luther hi yexe; ku nga ri Luther, ku nga ri Wesley, ku nga ri vasunguri lavaya vakulukumba. Kambe endzhaku ka ku famba ka vona, ku vile na kereke leyi nga pfuxiwa, nakona va...xana va endlile yini hi yona, va endlile vandla hi yona. Va amukerile mukhuva na swin'wana, hiloko va fambela ekule. Kutani va languteni namuntlha, sweswi va fikile eka Huvo liya ya Tikereke ta Misava.

⁹⁹ Sweswi, ma swi vona, kambe hi masiku ya makumu, ma swi vona, hi vona swilo swi ri karhi swi humelela sweswi leswi nga se tshamaka swi humelela. Wa vona, i xikombiso xa Xikwembu, nakona hinkwako ku hlangana loku i xikombiso xa nkarhi. Sweswi, hi lava ku langutisa sweswo hi vukheta kutani hi va na ntuyiso swinene leswaku hi swi kumile. Ku sukela... va sukela Rito ra ntuyiso hikokwalaho ka tidinominexini; ku amukela mukhuva na mavonele ya vavanuna vo hambana-hambana ematshan'wini ya Rito.

¹⁰⁰ Nhlavutelo 10 yi te, "Hungu ra ntsumi ya vunkombo." Sweswi tsundzukani, sweswo swi le ka Tinanga ta Nkombo, nakona ku na tintsumi ta nkombo leti yimbaka Tinanga ta Nkombo. Sweswo hileswi hi nga ta ya eka swona ku nga ri khale. Kambe tsundzukani laha, hi ku kongoma Yi nge te, "Ra ntsumi..." ku nga ri Nanga ya ntsumi ya vunkombo, kambe "Hungu ra ntsumi ya vunkombo." Wa vona, ku nga ri ntsumi ya Nanga, ntsumi ya Hungu! Wa vona, ntsumi a yi yimba nanga ntseña, ntsumi liya ya vunkombo, ntsumi ya Nanga. Kambe leyi yi ri, "Hi masiku ya Hungu ra ntsumi ya vunkombo," wa vona, loko Hungu ra yona ri herile. Wa vona, lero i Hungu ra nguva ya kereke. Hi nkarhi lowu, kutani yi ta... Hungu, ku nga ri Nanga, kutani "xihundla xa Xikwembu (lexi xi nga tsariwa eRitweni) xi ta hetiseka."

¹⁰¹ Sweswi langutisani leswaku i siku muni leri hi hanyaka eka rona! Langutisani Swilemo leswiya, hilaha sweswo swi nga koka Rito leriya ri nga hangalasiwa ra Xikwembu, leswi Luther na lavan'wana hinkwavo, leswi tona tirhifoma letikulu leti ti ngaya emahlweni; ti nga tlhelela endzhaku kutani ti swi kombisa hi Bibele, laha va nga ta va va ri kona; munhu un'wana na un'wana exivandleni xa yena, leswi a ta swi endla na leswi a swi ta humelela eka kereke; leswi a ta swi endla, na leswi a swi ta humelela eka kereke; hinkwaswo leswi a nga swi siya. Kutani, hi siku ra makumu, loko hi nga se tiva nchumu hi swona, va hi vhumbherile hi nchumu wo karhi lowu a wuri eku humeleleni; na hambi ku ri maphepha-hungu na swilo swi wu kumile, kutani swi rhelela swi ta wu paluxa na ku boha swihundla kun'we. Amen! Makwerhu, sweswo swi sasekile ngopfu eka mina! Sweswo, eka mina, swi longoloxa Rito. Amen! A ndzi na mhaka leswaku—leswaku, kumbe, ndzi na mhaka na leswaku vanhu va vula yini, ku ehleketa, sweswo swi kahle, kambe eka mina i Ntuyiso.

¹⁰² Tani hi tintlhарhi ta vavanuna, ku rhelela ku suka eBabilona, ti huwelerile, "Xana Yi kwiji, Hosi ya Mayuda leyi tswariweke? Yi le misaveni, kona sweswi. Hi fanele ku Yi kuma." Hi swona sweswo. Nakona ndzi pfumela leswaku Yi le kusuhi ngopfu na ku vuya lero ndzi nga vula leswaku, "Vonani, Muteki wa ta! Ndzi twa ku rila ka ni yusiku!" Amen! Hi le nkarhini wa makumu. Oho, mina, awara leyи hi hanyaka eka yona. Xiyisisani. Wa vona?

¹⁰³ I siku muni! I nkarhi muni lowu hi hanyaka eka wona, xihundla xa Xikwembu lexikulu xi nga eku hetisekeni; ku tisa Vukwembu, ku kombisa leswi Byi nga swona; hilaha tiism letintsongo, kutani va suka va ya N'wi endlela *leswi*, kutani un'wana a N'wi endlela *leswi*, nakona un'wana u N'wi endlerile *sweswo*. Kambe Ntsumi ya Hosi yi xikerile ehansi kutani yi tisa tiism ta vona hinkwato, kutani yi kokela Ntiyiso walowo ehandle ka tona, ivi yi Wu kombisa. Kutani hi Walowo, ntsena hi ku hetiseka tanahi laha Wu nga vaka hakona, ku hava ndlela yin'wana leyi u nga yaka kona. Hi Sweswo, sweswo hileswi A nga swona. Wa vona, mbewu ya nyoka, hinkwaswo—hinkwaswo swilo leswi swo hambana-hambana leswi swi nga va swo hlamarisa exikarhi ka vanhu. Wa vona? Xana i yini? A ri na... Lexi i xikombiso eka yini? Xa ku hlangana!

¹⁰⁴ Xana U te yini eka Malakiya4? U ta tlherisela! Ku tlherisela Ripfumelo ra xiviri ra xipentekosta, endzhaku eka vanhu lava va nga na Hungu leri fanaka ra xipentekosta, xikombiso lexi fanaka xa xipentekosta, vumbhoni lebyi fanaka bya xipentekosta, Xikwembu lexi fanaka, Matimba lama ma fanaka, dyondzo leyi fanaka, swilo hinkwaswo hakunene-nene, hi nkombiso wa Langavi leri fanaka ra Ndzilo leri nga tlhava Saul endleleni, yo ya eDamaska ri le xikarhi ka hina namuntlha, ri ri karhi ri endla swilo leswi fanaka leswi Ri nga swi endla hi siku lero. Ku hlangana!

¹⁰⁵ Hi vona matiko ma ri karhi ma hlangana, hi vona misava yi ri karhi yi hlangana, hi vona tikereke ti ri karhi ti hlangana. Hi vona Mutekiwa a ri karhi a hlangana, ku hlangana na Rito. Hikokwalaho ka yini? Rito i Xikwembu. Nakona tanahi Rito... Tani hi Muteki (tanhah Rito), na Mutekiwa (ku va a ri muyingiseri wa Rito), Va hlangana va hlengeletana kun'we hi Vun'we. Va hlangana kukotisa nkhuvo wa vukati. Wa vona, Va tilulamisela nkhuvo wa vukati, nakona Va—Va hundzuka Un'we. Rito ri hundzuka wena, wena u hundzuka Rito. Yesu u te, "Hi siku rero mi ta swi tiva. Hinkwaswo leswi Tatana a nga xiswona, Ndzi swona; na hinkwaswo leswi Ndzi nga xiswona, na n'wina mi swona; kutani hinkwaswo leswi n'wina mi nga xiswona, Ndzi swona. Hi siku rero mi ta swi tiva leswaku Ndzi le ka Tatana, Tatana u le ka Mina, Mina ndzi le ka n'wina, na n'wina mi le ka Mina." Wa vona? Hi "siku lero." Siku rihi? Siku leri! Hi kuma swihundla leswikulu leswi tumbetiweke swa Xikwembu swi ri karhi swi paluxiwa. Oho, ndzi swi rhandza njhani sweswo!

¹⁰⁶ Oho, vonani hilaha sayense na Rito a swi nga ta pimanyeteka, tanahi laha swi endlaka hakona namuntlha. A swi nga ta swi endla eku sunguleni. Ko va sweswi laha swi swi endlaka.

¹⁰⁷ Xiyisisani, U te, "swikombiso swa le tilweni, swikombiso swa le tilweni." Sayense, na swikombiso swa matiko; sweswi va na swikombiso leswikulu empfhukeni namuntlha, va na vanhu lava yaka empfhukeni hi xibamubamu na hinkwaswo. Kambe xana i

yini lexi vativi lava va tinelyeti va xi endlaka eka misava, sayi ni ke? Swi va tisela ku chava. A va swi tivi leswaku i nkarhi wihi lowu va nga rhumelaka swin'wana swo kotisa sweswo ehenhla kutani va cukumeta tibomo leti, kutani hi ta va hi herile. Wa vona? Sweswi sweswo i swikombiso leswi va nga swi kuma, mbono wo chavisa wa le tilweni. Wa vona? Va va kumile, timizayili ta athomiki na hinkwaswo, tinxaka hinkwato ta swikombiso.

¹⁰⁸ Ma ku vona laha va nga sayina ntwanano lowu—lowu, siku rin'wana, leswaku a va nga ha ta bulukisa tibomo tin'wana hi le henhla, kambe sweswi va famba hi le hansi ka mati na le hansi ka misava, va ri karhi va ti kambela hilaha ku fanaka. Wa vona? Va sayina ntwanano, “A hi nge endli leswi, loko mi vula leswaku a mi nge swi endli (kambe hi ta tlhelela ekaya hi ya swi endla hi ndlela leyi; loko hi ri karhi hi swi tiva leswaku mi le ku endleni ka nchumu wun’we kwahalano).” Wa vona? Ntsena a ko va na nchumu, ntsena ko va . . . a ku na ku tshembhana exikarhi ka vona, a ku na—a ku na nchumu. Mi nga . . . Wa vona? Kutani hinkwavo va chava loyi un’wana. Xexo i xikombiso xa ku chava.

¹⁰⁹ Sayense na munhu na matiko swi humelerisile xikombiso xa ku chava emphukeni. Sweswo hi swona ngopfu. Sweswi, ku chavana. Kutani ku vile na xikombiso xa le tilweni lexi xi nga nyiketiwa eka . . . Wa vona sweswi, va na xikombiso etilweni na vona, xikombiso xa ku chava, wanuna endzeni ka xibamubamu; a nga ha va a ri na mizayili ya athomiki, nakona a nga ha yi cukumeta ivi yi herisa tiko hinkwaro. Ku ya ehenhla hi xibamubamu, kutani va yima kwalahaya. Ku hava nchumu lowu wu va sivelaka ku swi endla. Va nga va na ntiyiso wa ku swi endla, va . . . nkarhi wun’wana na wun’wana lowu va lavaka ku swi endla. Va nga ha yi vangela ritshuri loko va swi lava, kambe . . . hi khume ntlhanu wa timinetse ku sukela sweswi. Kutani leswi un’we anga swi endlaka, loyi un’wana na yena hi ndlela yaleyo, na yena. Swingaleswi, ma swi vona leswaku va na xikombiso, kambe muxaka walowo wa xikombiso wu endla leswaku va chava.

¹¹⁰ Va le ku hlanganeni kun’we, va veka matimba ya vona kun’we. Misava yo ntshuxeka, yi le ku vekeni ka matimba ya yona kun’we. Xikhomonisi xi le ku vekeni ka matimba ya xona kun’we na Russia. Munhu un’wana na un’wana; kambe un’wana na un’wana u chava loyi un’wana. Wa vona, i xikombiso xa ku chava. Hi swona sweswo. Sweswi i swikombiso swa tiko, na swilo.

¹¹¹ Kambe Kereke yi amukerile Xikombiso xa le Tilweni: Munhu la yaka emphukeni! Amen! Yesu Kreste, hi xivumbeko xa Langavi ra Ndzilo; leri A ri rona eka Testamente ya Khale, leri A ri rona loko A hlangana na Saul endleleni yo ya eDamaska, Yesu un’we lahwani namuntlha! Kutani xana Swi endla yini? Xana Swi tisa ku chava? Swi tisa rirhandzu, ku hlangana ka un’wana

eka un'wana. Amen! Ku twelana ka un'wana eka un'wana. Swi tisa Rirhandzu ra Xikwembu, oho, ku hi hlanganisa na ku hi tisela, Miri wa Kreste, eka vun'we tanahi Mutekiwa. Sweswo hileswi swi nga eku swi endleni sweswi, vun'we lebyikulu lebyi Xikwembu...

¹¹² Va le ku tihanganyeteni hi voxé, ntlawa wun'we *lahawani* ku lwa na lowun'wana, ntlawa wun'we *lahawani* ku lwisana na lowun'wana. Lahawani kereke yi yimile exikarhi ka vona; mi vona leswi nga ta humeleta, yi ta hlangana na vona. Sweswo hi swona ngopfu. Kambe, sweswi, hi kuma leswaku sweswo swi tisa ku chava na tempfilumpfilu.

¹¹³ Kambe Kereke, Mutekiwa, u hlanganyetiwa hi Xikwembu xin'we, ehansi ka Moya wun'we, Moya wa Xikwembu, hi Vun'we byin'we byo kwetsima bya Xikwembu, ku va Mutekiwa un'we wo kwetsima eka Xikwembu. Hi swona sweswo, hinkwaswo kun'we; vun'we bya Miri. Miri wu rindzerile tanahi Mutekiwa; tani hi—tani hileswi Wu nga Mutekiwa, tanahi leswi hi tivitanaka Mutekiwa. Hikokwalaho ka nkarhi wa ku hlanganyetiwa ka Mutekiwa. Kereke yi le ku hlengeletaneni kun'we. Swi fanele ku tumbuluxa ntseña rirhandzu exikarhi ka hina, leswaku hi taka hi nga vi ekule na un'wana eka un'wana. Hi swona sweswo. Ntsena loko n'wina, mi nga boheki ku kombela vanhu ku va va khongela, mi nga boheki ku va kombela ku va va gandzela Xikwembu, mi nga boheki ku va kombela ku endla leswi swi nga lulama. Ntsena vo va eku rhandzaneni na Yena, kukondza ku nga ha vi na swin'wana.

¹¹⁴ Xana mi eheleketa yini hi xinhwanyetana, wanhwana lontsongo wo saseka swinene, loyi a nga ta tekana na jaha rin'wana ro saseka leri a ri rhandzaka ku tlula mpimo, swi vula swo tala eka yena ku tlula vutomi bya yena n'winyi, nakona a swi tiva xikan'we-kan'we leswaku va ta tekana? Loko siku leriya ra ku tekana ri tshinela, nakulorhi luya lontsongo, ndza mi byela, u ta va a ri karhi "a rhendzeleka kwalahaya." Wa vona? Ntsena u le ku lulamiseleni ka hinkwaswo; u tinyiketela eka yena hi ku hetiseka. Hi swona sweswo. Hinkwaswo leswi swi tsakisaka jaha, sweswo hileswi a lavaka ku swi endla. Kunene, yaleyo a ku fanele ku va ku ri ndlela ya Kereke namuntlha, leswaku vutomi bya hina a byi fanele ku va byi fihiwile swonghasi eka Xikwembu ha Kreste, byi lemeriwile kwalahaya hi Moya lowo Kwetsima.

¹¹⁵ Nchumu lowu a ndzi ri karhi ndzi mi dyondzisa wona lahawani, i ku mi byela hi swikombiso leswi na swilo swo hambana-hambana leswi swi humeletaka, a ndzi na nkarhi wo swi endla sweswi; ndzi ta swi endla eka hungu rin'wana, loko Hosi yi swi rhandza. Kambe ku na nchumu wun'wana wuntsongo lowu kayivelaka eKerekeni. Nakona hi lava sweswo, ku nghena eka sweswo, nakona ndzi le makumu ka swona sweswi. Wa vona? Hi lava ku nghena eka sweswo, loko...mi

fanele ku swi endla. Loko mi nga swi endli, sweswo hi swona ntsena, mi fanele ku swi endla. Hikuva vonani, nkarhi wa ku hlangana wu le kusuhi, hikuva Xikwembu xi le ku hlengeleteni ka Kereke kun'we ku va e—e ku Vutliwa ku ya eka vukati bya Vun'we Lebyikulu: loko Xikwembu na munhu swi ta hlangana hilaha ku nga Heriki, loko swivumbiwa swa nkarhi swi ta hlangana na leswi nga riki na ku Hela.

¹¹⁶ Swi tshama swi endliwa hi xivumbeko xa N'wana wa munhu emisaveni. Nakona a fanele ku nyikela Vutomi bya Yena ku va a humelerisa matimba, ku hlanganisa vanhu van'wana na Matimba lama ma fanaka, hikokwalaho ka Mutekiwa wa Yesu Kreste. Kutani sweswi Kereke yi le ku hlanganyeteni hi Yoxe eka Miri wa Kreste. Yi tintshuxile Yona hi yoxe, yi ti tsemela ekule na swipimelo hinkwaswo leswintsongo, ku va Yi tilulamisela; ku hlengeletana kun'we, ku hlangana exikarhi ka vona; oho, rirhandzu na ntsako, na Moya lowo Kwetsima wu ri karhi wu famba-famba exikarhi ka vona. Oho, mina, i nkarhi muni!

¹¹⁷ Tani hiloko hi vona masekwa ma ri eku lunghekeni, hi vona mapilipili ma ri karhi ma lungheka, hi vona xivandzana... tinyoxi ti ri karhi ti lungheka, hi vona mapapa ma ri karhi ma lunghekela mpfula, hi vona hinkwaswo; hilaha swi tihlanganisaka kun'we, hikokwalaho ka ku susemetiwa lokukulu ka swona. Hi vona Nhlangano wa Matiko, wa matiko kun'we, ma ri karhi ma tihlanganisa eka xikhomonisi. Hi ma vona ma ri karhi ma tihlanganisa lahwani Matikweni ya Vupela-dyambu. Hi vona kereke yi ri karhi yi tihlanganisa kun'we, letin'wana hinkwato. Swingaleswi a swi nga koteki na swintsongo, a ku na nkarhi wun'wana laha a swi ta va hi ndlela leyi; a swi nga ta va swi ri hi ndlela leyi eka makume mbirhi wa malembe lawa ya nga hundza, a swi nga ta va swi ri hi ndlela leyi. A swi nga ta va swi ri hi ndlela leyi eka khume ra malembe lawa ya nga hundza, swi fanele ku va kona sweswi. Wa vona, hikuva tiism na swilo a swi se fika eka xiyimo lexi.

¹¹⁸ Sweswi pfukani! Tidzungudzeni, hi xihatla, kutani mi langutisa laha hi nga kona! Xana hi le kwih? Kukotisa tintlharsi letiya, hi longolokile na Rito ra Yona, nakona Rivoni ra Hosi ri vangamela endleleni ya hina. Ku Kwetsima a kuve ka Hosi eHenhla-henhla. Naswona ku Kwetsima a kuve ka Xikwembu Lexi xi hi nyikeke Yesu Kreste, Loyi hi n'wi rhandzaka, nakona u hi tisile eka ndhawu leyi. Kutani tani hi... Hi vanhu va Yena, hi xaviwile hi nxavo wa Ngati ya Yena.

¹¹⁹ Oho, mina! Loko nkarhi wa ku hlangana wu ta, hi le ku langutiseni, loko hi ri karhi hi hlangana na un'wana eka un'wana eka swibohi swa Moya wa Yena, hi... Xana ku nga va ku ri Moya wa Yena? Kunene, I Moya wa Yena. Hikokwalaho ka yini ku ri Wona? I Rito ra Yena, nakona U... walowo i Moya wa Rito. Kutani loko Moya walowo wa Xitshembhiso wu ta ehenhla ka n'wina na ku tiyisisa na ku tikombisa hi Woxe lahwani, xana

wa ha ri Moya lowu fanaka? A ku ri Wona lowu a wu ri na Muxe emananga! A ku ri Wona lowu a wu ri ehenhla ka Kreste! Hi Wona lowu nga hlangana na Saul endleleni ya yena yo ya eDamaska! Hi la fanaka tolo, namuntlha, na hi masiku! Nakona U endla nchumu lowu fanaka!

¹²⁰ Kutani hi vona matiko ma ri kun'we, hi vona tinhloko ta kereke ti ri kun'we, hi vona xikhomonisi xi ri kun'we, hi vona tiism ti ri eku hlanganeni, hi vona swilo leswi hinkwaswo; nakona sweswi hi vona Mutekiwa a ri karhi a hlangana na Rito. Oho, mina! I nkarhi wa leswaku vakwetsimi va ta hlangana na lava va hanyaka, ku ya va ya hlangana na Yesu Kreste hilaha ku nga Heriki.

¹²¹ Ingaku Xikwembu xi nga hi pfuna, un'wana na un'wana, ku hlangana na Kreste vusiku lebyi, hi ta tshiketa hinkwaswo leswi hi nga xiswona, hinkwaswo leswi hi nga na swona, mimoya-xiviri ya hina hinkwayo, mimiri, na miehleketo, eka Yesu Kreste, kutani hi langutela nkarhi wa ku hlangana kwaloko.

Loko mhalamhala ya Xikwembu yi ta yimba,
kutani nkarhi wu ta va wu herile,
Kutani mixo wu humelela hilaha ku nga
Heriki, wu vangama na ku va kahle;
Loko lava nga fela eka Kreste va ta pfuka
kutani va hlengeletana eribuweni lerin'wana
hi lahaya (na Mutekiwa loyi a hanyaka), ku
va va vutliwa swin'we.

¹²² Langutisani eka ku hlangana! Xikwembu xi hlanganisa Kereke na Rito ra Xona, Rito na Kereke, leswaku ha vumbirhi swi va nchumu wun'we, "Vula *leswi*, kutani swi ta humelela. Endla *leswi*, kutani swi ta humelela. Leswi hi swona; loyi hi Mina emahlweni ka wena, loyi hi Mina ndzi swi khorwisaka; loyi hi Mina ndzi nga na wena." Swi lulamile.

¹²³ Hi kuma leswaku sweswi nkarhi wa ta laha Mhalamhala yi nga ta yimba, kutani vakwetsimi lavaya va nga etlela le ndzhaku, va nga ka va nga hetiseki ehandle ka hina; va tshembherile eka hina (Vaheveru 11); kutani loko va hlengeletana, va hlangana na varhandziwa va vona. Kereke yi hlangana na Rito, kutani Kereke na Rito swi hlangana kun'we, swi ri karhi swi hundzuka un'we. Vakwetsimi lava nga fa na vakwetsimi lava va hanyaka va hlangana kun'we ku va un'we; nakona hinkwavo va famba swin'we ku ya hlangana na Kreste kwalahaya, eka Nkhuvu wa Vukati bya Xinyimpfana.

¹²⁴ I nkarhi wa ku hlangana, nakona swikombiso swi le ku haheni hinkwako. Swikombiso swi le matikweni, swikombiso swi le ka xikhomonisi, swikombiso swi le Matikweni ya Vupeladyambu, swikombiso swi le ka Huvo ya Tikereke. Nakona Xikombiso xi kona kwala vusiku lebyi ehansi ka nseketelo wa Moya lowo Kwetsima, kutani Rito ra Xikwembu ra swi tiyisia

na ku swi endla Ntiyiso. Amen! Nkarhi wa ku hlangana! Nkarhi wa ku Hlangana!

A hi korhamiseni tinhloko ta hina.

¹²⁵ Hosi Yesu, tanihi leswi mbilu ya mina ya vusiwana yi tlulaka hikokwalaho ka ntsako, tanihi loko ndzi vona ku koteka ka mina, wanuna wa malembe ya le xikarhi, kambe hambiswiritano, ku koteka ka ku va mina ndzi vona Wena u ta eka nguva ley; ku va u hanya na ku yima laha, na ku vona loko Mhalamhala liya yi yimbiwa, "Loyi a tinyamisaka, a engete a tinyamisa. Loyi a lulameke, a engete a lulama. Loyi a kwetsimaka, a engete a tiktikwetsimisa." O Hosi Xikwembu!

¹²⁶ Kutani ku ehleketa hi ku va hina hi yimile, hi xinkadyana, hi ku copeta ka tihlo, laha misava yi nga taka yi nga swi tivi leswaku ku humelela yini, kambe hi xitshuketani, mi ta vona va humelela emahlweni ka n'wina, varhandziwa va n'wina lava va nga hundza, va ta ku ta hlangana na n'wina nakambe. Nakona hi ta cinciwia hi xinkadyana, hi ku copeta ka tihlo; kutani hi vutleriwa ehenhla, swin'we, ku ya hlangana na Hosi ya hina emoyeni. Kutani hi hlangana na Yona, ku va kwalahaya hilaha ku nga heriki, na ku ka hi nga ha tlheli hi huma eVukoneni bya Yona nakambe.

¹²⁷ I nchumu wa kahle njhani namuntlha, Hosi, ku tiva leswaku sweswi hi hlanganisiwile hi Moya wun'we. Moya wun'we, Moya lowo Kwetsima, wu khomile Rito exandleni xa Wona, wu nghena eka hina. Nakona i nchumu wa kahle njhani, i nkateko wa njhani ku titsema ku suka eka misava hinkwayo, ku tihlanganissa na Yesu Kreste. Kutani ku ehleketa leswaku siku rin'wana, hi xivumbeko xa xinyama, na hi miri lowu fanaka na miri wa Yena N'winyi lowo kwetsima, hi ta tshama etafuleni eNkhubyeni wa Vukati kutani hi hlanganyetiwa na ku tekana hi vukati na Yena; ku hanya tanihi Mutekiwa na Muteki ku hundza eka minkarhi hinkwayo leyi nga ta ta, hilaha ku nga Heriki.

¹²⁸ Hosi Xikwembu, ingaku leswi swi ngo va swi nga vi ntsena mianakanyo ya tsheketo eka vanhu, kambe ingaku yi nga hundzuka ya xiviri kukondza ndlala leyo tano na torha swi nga tshama endzeni ka vanhu leswaku va ta...ku hlaya maphephahungu, ku langutisa ehenhla ka...ku yingisela xiya-ni-moya na mahungu, na ku vona leswaku i nkarhi wa ku hlangana. Swikombiso swi le ku hatimeni.

¹²⁹ Hosi Xikwembu, tanihi laha hi nga vulavula hi vavasati, leswi va nga ta swi endla hi masiku yo hetelela; leswi kereke yi nga ta swi endla hi masiku yo hetelela; na leswi Tinguva ta Kereke ti nga ta va xiswona, na leswi Swilemo swi nga ta va xiswona, na swilo leswin'wana hinkwaswo. Kutani hi vona hilaha a swi ri hakona, hi masiku ya Nowa. Hi vona hilaha a swi ri hakona, hi masiku ya Sodoma na Lot, loko Ntsumi ya Xikwembu yi titivisile hi Yoxe enyameni ya munhu, loyi a nga

dya nyama ya homu na ku nwa masi yo huma eka homu, na ku dya xinkwa; na ku yima kwalahaya nakona a yi swi kota ku vula leswi a swi humelela endzhaku ka Yona. Kutani Yesu u vurile leswaku nchumu lowu fanaka wu ta humelela eku vuyeni ka N'wana wa munhu.

¹³⁰ Hosi Xikwembu, hi vonile phiramidi, hilaha hi nga yi aka kwalahaya, na ku vona hilaha hi nga engetelela swilo leswi eka yona; kutani hi kuma leswaku hi le nkarhini wa makumu, hi yimerile Ndhuna ya Ribye ra yinhla. Ku kwetsima akuve eka Xikwembu! Ha khongela, Tatana, leswaku U ta pfuxa vanhu, hi xihatla sweswi, kutani u hi hlengeleta kun'we, hi rirhandzu ra vukwembu na ku xixima eka Yesu Kreste na le ka un'wana eka un'wana.

¹³¹ Loko ku ri na van'wana lahwani yusiku lebyi lava mi nga riki na ntshembho walowo endzeni ka n'wina, yimisani mavoko ma n'wina eka Xikwembu kutani mi ku, "Hosi Xikwembu, ndzi hlanganisi na Wena, ndzi hlanganisi na Wena"? Xikwembu xi ku katekisa, boti. Xikwembu xi ku katekisa, na wena, wena; ina. "Ndzi hlanganisi na Wena, Hosi." Ina! Oho, mina!

Matiko ma le ku fayekeni, Israel ri le ku
pfukeni,

¹³² Langutisani Israel lahaya, ri hlanganile kun'we. Israel, ku suka emisaveni hinkwayo, va tile ku va va tihlangenyeta; ku tihlanganisa nakona sweswi hi vona tiko. Hi vona tiko leri nga hlangana: na mujeko wa vona vinyi, mali ya vona vinyi, vuthu ra vona vinyi, hinkwaswo; loko ku ri ku va tshama va va swona, va swona sweswi. Israel ri hlanganile, Rhoma ri hlanganile, kereke yi hlanganile. Na Mutekiwa u le ku hlanganeni, amen; na ku ta ka Vun'we lebyiya Lebyikulu. Xana i yini? Hinkwaswo swi tlhandlukela eka Xikombiso xexo, Xikombiso xexo lexikulukumba, Yesu na Mutekiwa wa Yena lava va hlanganaka ku va un'we.

¹³³ Tatana, Xikwembu, hi nyike minkateko leyi ndzi yi kombelelaka vanhu lava, nakona ingaku hi nga hlanganisiwa na Wena hi mbilu na moyo, loko va ha yimisa mavoko ma vona, hi ku navela sweswo. Hosi Xikwembu, hi basise na ku hi endla va Wena; hi nyike swona, Hosi. Sweswo hi swona ntsena leswi hi swi tivaka na kukota ku swi endla, i ku kombela. Nakona U vurile leswaku loko hi swi kombela na ku swi pfumela, hi fanele ku swi kuma; ndzi swi languterile, Hosi. Ndza Ku khensa hi Vito ra Yesu Kreste. Amen.

Ndza N'wi rhandza, Ndza N'wi rhandza,
Hikuva U sungurile a ndzi rhandza,
Na ku xava ku ponisiwa ka mina
Emhandzini ya khalivhari. (Amen. Oho, mina!)

Vonani, Muteki wa ta!
 Ndzi twa ku rila ka ni vusiku!
 Hi ta tlhandlukela ehenhla hi ku huwelela,
 loko hinkwerhu hi khomelela,
 Kutani hi hlangana na Yena empfhukeni.
 Langutela u khongela, makwerhu wa mina,
 Leswaku un'wana a nga teki harhi ya wena,
 Hikuva lavo kufumela na lavo wa
 Va nga ka va nga ambali nguvu ya vukati.

¹³⁴ Hi swona sweswo. A hi tilulamiseleni ku rila loku ka ni vusiku. Ku ta fika hi awara leyi u nga yi ehleketeleliki. Ku ta va na ku rila, ku nga ri exikarhi ka misava leyi nga pfumeriki; ku ta va ku ri xihundla. Kambe vapfumeri, lava va languteleke leswi: Ma ti vona tineyleti ti ta ti longolokile? Wa vona? Xana swi humelerisile yini? Ntsena tanihi laha swi nga endla hakona ro sungula. Wa vona, hi hina lava, swikombiso swi le ku teni.

Hi vona swikombiso swi ri karhi swi humelela
 swa ku Vuya ka Yena ko kwetsima,
 Vonani, vonani matluka ma nkuwa ma va
 rihlaza sweswi;
 Evhangeli ya Mfumo yi yile eka tiko rin'wana
 na rin'wana;
 Kutani hi le kusuhi, makumu ma nga voniwa.
 Kutani hi ku tsaka, ekule, hi ta rhwala Hungu
 ra ku humelela ka Yena ko kwetsima,

¹³⁵ Xana hi swona sweswo? Oho, ku rhwala Hungu ra ku humelela ka Yena ko kwetsima! Sweswo hileswi hi faneleke ku swi endla. Byelani vanhu hinkwavo, “Lunghekani, tilulamiseleni ku hlangana na Xikwembu.” Amen! Ndza N’wi rhandza. Oho, ndzi N’wi rhandza njhani. Sweswi, a hi yimeni hi milenge ya hina sweswi. Loko hi ri karhi hi lelana, fikelela ekusuhi kutani u qhavula voko ra un’wana, kutani u ku:

Kukondza hi hlangana! (Qhavulanani mavoko,
 sweswi.) . . . kukondza hi hlangana!
 Kukondza hi hlangana emilengeni ya Yesu;
 Kukondza . . .

Tsundzukani, mi nga ha vitaniwa. Nhlengeletano ya hina yi nga hava emilengeni ya Yena.

Oho, Xikwembu a xi ve na n’wina kukondza hi
 hlangana nakambe!

¹³⁶ Sweswi, ntsena ehleketa, loko hi nga se hlangana nakambe; loko hi nga se hlangana hi Sonto ni mixo, kumbe hi Ravunharhu ni vusiku, ku nga ha va leswaku . . . xo sungula lexi mi xi tivaka, munhu un’wana u lahlekile. Loyiwani u lahlekile, nakona va fambile. Oho, ku ehleketa hi ku va nuna wa wena a lahlekile, kumbe nsati wa wena a lahlekile, na—na nsati wa John u

lahlekile, na—na—na lahawani vana va lahlekile. Hinkwaswo swi humelerile (xana ku humelerile yini?), kutani u siyiwile!

Oho, i ku humesa mihloti na ku kalakala
njhani loko lava va nga lahleka va byeriwa
hi makumu ya vona,
Va rilerile maribye na tintshava, (Ku kotisa
Israel, loko ri tlhelela endzhaku edorobeni,
ku ya etempeleni.)
Va khongerile kambe swikhongelo swa vona a
swi hlwerile. (Va arile Hungu.)

¹³⁷ Oho, makwerhu, u nga pfuki u swi endlile sweswo. Hambi ku nga va yini leswi u swi endlaka, yima u tiya eka xivangelo! Ina, nkulukumba!

¹³⁸ Sweswi, kukondza hi hlangana, hi ta endla leswi:

Teka Vito ra Yesu u famba na rona,
Tani hi xitlhangu eka ku hlayisa hinkwako;
Loko miringo yi hlengeletana ekusuhi na wena,
(Xana u endla yini?)
Hefemula Vito lero kwetsima hi xikhongelo.
Vito ro hlawuleka, O hilaha ri tsokombelaka
hakona!
Ntshembho wa misava na ntsako wa le Tilweni;
Vito ro hlawuleka, O hilaha ri tsokombelaka
hakona!
Ntshembho wa misava na ntsako wa le Tilweni.

¹³⁹ A hi korhamiseni tinhloko ta hina sweswi, loko hi ri karhi
hi hama:

Ku nkhisama eVitweni ra Yesu,
Ku badama emilengeni ya Yena,
Hosi ya tihosi eTilweni . . . Yi ambexa harhi,
Loko rendzo ra hina ri helerile. (Ri ta va tano,
siku rin'wana.)
O Vito ro hlawuleka, Vito ro hlawuleka, O
hilaha ri tsokombelaka hakona!

Kukondza hi hlangana nakambe, Xikwembu xi va na
n'wina.

Ntshembho wa misava na ntsako wa le Tilweni;
Vito ro hlawuleka, O hilaha ri tsokombelaka
hakona! Hilaha ri tsokombelaka hakona!
Ntshembho wa misava na ntsako wa le
Tilweni.



NKARHI WA KU HLANGANA NA XIKOMBISO TSO63-0818
(The Uniting Time And Sign)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Sonto ni madyambu, Mhawuri, 18, 1963, eTabernakeleni ya Branham eJeffersonville, Indiana, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2019 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE
58 DISA ROAD, ADMIRAL'S PARK, GORDON'S BAY 7140 WESTERN CAPE
REPUBLIC OF SOUTH AFRICA

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org